

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiquehir, tivireta reseve.

³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram.

⁴ Aram rahir Aminadab, Aminadab rahir Naasón, Naasón rahir evocoyase Salmón,

⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí,

⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa.

⁸ Asa rahir Josafat, Josafat rahir Joram, Joram rahir evocoyase Uzías.

⁹ Uzías rahir Jotam, Jotam rahir Acaz, Acaz rahir ahe Ezequías.

¹⁰ Ezequías rahir Manasés, Manasés rahir Amón, Amón rahir evocoyase Josías.

¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

12 Mbiguai yuvirecoire Jeconías omboyesu Salatiel, Salatiel rahir ahe Zorobabel.

13 Zorobabel rahir Abiud, Abiud rahir ahe Eli-aquim, Eliaquim rahir evocoyase Azor.

14 Azor rahir Sadoc, Sadoc rahir ahe Aquim, Aquim rahir evocoyase Eliud.

15 Eliud rahir Eleazar, Eleazar rahir ahe Matán, Matán rahir evocoyase Jacob.

16 Jacob rahir José, María mer, María evocoyase Jesús si secoi. Ahe imembrí Tūpa Rembiporavo Poropĩsĩrosar.

17 Evocoyase Abraham yesusa sui tupri oye-pota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropĩsĩrosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

18 Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiẽhi viteseve rumo, Espĩritu Santo pĩratasa pipe imembi.

19 Evocoyase José, imevi, ahe ava seco catupri vahe, “Tapoiño ayase ava icuaẽhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe.

20 Aipo opihañemoñeta reseve oque. Iquerve rumo, Tūpa rembiguai oyemboyecua chupe aipo ehi: “José, David suindar, eresiquiyei rene María

rese nde menda ãgua. Esepia, Espíritu Santo sui ou imembirã.

²¹ María virecose omembri, pemondora sererguã Jesús. Esepia, ahe oipisirora omu judío eta yangaipa sui” ehi.

²² Co rupi opa yavíye yande Yar remimombehugüer aipo ehi vahecuer ñehe mombehusar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi
 (“Tüpa yande rese ité secoi’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute.

²⁵ Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sêsa cotindar yuviraso pītani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve.

² Ahe oporandu Herodes upe yuvireco aipo ehi:
 —¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei ãgua —ehi yuvireco chupe.

³ Aipo ihese, mborerecuar Herodes oyembosiquíye tēi, ava Jerusalén pendar avei ēgüe ehi pãve yuvireco.

⁴ Iyavei cūriteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropĩsĩrosar? —ehi.

⁵ Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tũpa ñehe mombehusar Miqueas rembicuachi-agüer pipe aipo ehi:

⁶ ‘Pe, tecua mini Belén pipendar, ndahei ivi coti tẽi vahe ambuae tecua Judá pipendar sui peico.

Esepia, pe sui osẽra mborerecuar che recua iguar Israel yocuai ãgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi.

⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pĩtani. Acoi peyosuse, co rupi avei peyevi cheu icua uca ãgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pĩtani recosa rese tupri tecua Belén ve opita yasitata.

¹⁰ Sepiase, ovihareté yuvireco.

¹¹ Ipare yuviroique oi pipe, osepia pĩtani ichi María reseve yuvireco. Ichui oñenopiha sovai imboeteisa pipe. Ipare opõhe ombahe riru pipe yuvireco oicuvẽhe vaherã oporerrecosa sepĩrusu

vahe oro, itaisi, ambuae mbahe s̄iacua vahe mirra serer vahe avei.

¹² Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyevi āgua.

Jesús pītani seroñemisa Egipto ve

¹³ Aipo ava yepepi pare, José upe oyemboye-cua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi āgua. Esepia, mborerecuar Herodes osecara pītani yuca āgua oico” ehi chupe.

¹⁴ Ahe pītu pipeve voi José viraso pītani ichi reseve Egipto ve.

¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

Herodes oyuca uca chīhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chīhivahe cuimbahemi yuvireco opacatu ñuvirío araviter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrtei.

¹⁷ Ēgüe ehi yaviye Tūpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi:

²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave.

²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso ãgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehusar remimombehugüer: “ ‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirēhisa rupi secoi

¹ Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaēhisave

² aipo ehi: “iPemboasi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei.

⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso ñehe rendu

⁶ oangaipagüer mombehu água. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca água, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaheṛã sui’ ehi tupri tēi pēu?”

⁸ Yipindar toyecua tupri rane Tūpa upe pe yevisa pe angaipar mboasisa pipe.

⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro água. Espia, Tūpa oicatuño ité co ita sui Abraham suindar nungar tupri apo água oyeupe nara yepi.

¹⁰ Hacha niha imoingatusa voi eté opacatu ivira ndihai vahe sapo rupi yasia água. Ichui yasia pare imondosa tatave.

¹¹ Che i pipe tēi opoãpiramo Tūpa upe pe yevi água. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora água ichui.

¹² Ahe oipehara mbahe rãhi ihigüer sui. Sãhi evocoyase oyapocatura, ihigüer rumo omondora tata apirēhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya.

14 Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

15 —Ëgüe tehiño aipo. Iyacatu yayapora Tũpa porocuaita —ehi Juan upe.

Evocoyase Juan, “Aviye” ehi chupe.

16 Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tũpa Espiritu ogüeyise ou iharive apicasu nungar.

17 Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

1 Ipare Tũpa Espiritu viraso Jesús ava yemboere-cuaẽhisave ‘tosecoãha Caruguar’ ohesa pipe.

2 Aheve cuarenta ari, cuarenta pĩtu ndocarui. Sese ndasiepoi eté oico.

3 Evocoyase oyemboya Caruguar sese secoãha ãgua, aipo ehi chupe:

—Tũpa Rahir ité nde recose, co ita sui eyapo pan cũritei —ehi.

4 Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñhengagüer reroya pipe ava yuvirecovera yepi’ ehi —ehiño chupe.

5 Ichui Caruguar viraso Jesús Jerusalén maranehi pipendar tũparo torre apiterve.

⁶ Aheve aipo ehi chupe:

—Tūpa Rahir ité nde recose, eviapi cohave sui. Esepia niha, icuachiapri pīpe:

‘Tūpa oyocuaira güembiguai eta nde rãro ãgua.

Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

⁷ Evocoyase omboyevī Caruguar upe:

—Icuachiapri pīpe rumo aipo ehi avei no: ‘Ndereseoãhai chira nde Yar Tūpa’ ehi —ehi chupe.

⁸ Ipare Caruguar vīraso iri ivitri ivate vahe apīterve secoãha ãgua. Aheve aipo opacatu ivi pīpendar, tecua guasu pīpendar mbahe porañete vahe yemboivate aisa omboyecua chupe,

⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde maha —ehi Caruguar chupe.

¹⁰ Aipo oyeupe hese:

—Eyepepi che sui cūritei, Caruguar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Caruguar upe.

¹¹ Ahese Caruguar oyepepi ichui. Ipare Tūpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve.

¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei.

14 Na ehi yaviye Tūpa ñehe mombehusar Isaías rembicuachiagüer aipo ehi vahe aracahe:

15 “Co ava ivi Zabulón pendar, Neftalí pendar, para guasu ivirindar, íai Jordán rovaíndar iyavei Galilea pípendar ndahei vahe judío,

16 ahe aviye pītumimbisave yuvirecoi vahe, osepia ramo vahe tesapesa yuvireco; iyavei mano rāgüer pipe yuvirecoi vahe upe avei aviye oyecua ramo vahe tesapesa” ehi.

17 Ahe arí suive Jesús omombehu Tūpa recocuer ava upe: “Pemboasi pe angaipa; peyeví Tūpa upe. Esepia, cōimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

18 Coiye ípa Galilea ivi oguatase, Jesús osepia mbía Simón Pedro serer vahe tivri Andrés reseve. Ahe pira omboha yuvireco.

19 Evocoyase:

—Pe pira recasar peico. Perio che rupi. Na peye aveira ava reca āgua cheu nara —ehi chupe.

20 Aipo he ramoseve, opoi opira mbohasa sui yuvireco, yuviraso supi.

21 Coi coti catu aipo Jesús osepia ambuae mbía Santiago tivri Juan reseve, ahe uguapi yuvinoi carite pipe oyesupa Zebedeo piri; omoingatu opira mbohasa yuvinoi.

22 “Perio che rupi” he ramoseve, opaño oporaviquisa sui opoi yuvireco, oseyañ oyesupa, yuviraso supi.

Jesús ombohe ava rehi

23 Jesús evocoyase uguata opacatu Galilea ivi rupi, judío tūparo yacatu rupi oporombohe oico.

Aheve ñehesa aviye vahe omombehu Tũpa mborerecuasa resendar. Oporombogũera avei opacatu-catu tẽi mbahehasisa ava vireco vahe sui.

²⁴ Oyepotase rumo serãcua opacatu Siria ivi rupindar upe, ahese gũeru opacatu iparaisu vahe yuvireco chupe: imbaheasi vahe, carugar vireco vahe, que nañaca põrai vahe iyavei ndoguatai vahe. Ahe opa tupri ombogũera.

²⁵ Ëgũe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, ïai Jordán rovaindar avei no.

5

Jesús oporombohe ivitriye

¹ Ñepeï ari pipe, ava rehii repiase, Jesús oyeupi ivitri rese. Aheve uguapi oĩ. Ahese semimbohe oyemboya yuvireco sese.

² Ichui omboipi imbohe aipo ehi:

³ “Sorivete catura acoi ava oicuase mbahe ipane vahe Tũpa rese ité güeco tupri ãgua. Esepia niha, chupe nara ité Tũpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tũpa omboura viharetesa chupe coiye.

⁵ “Sorivete catura ndaseco asimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catupriisa Tũpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tũpa oiparaisuerecora.

8 “Sorivete catura acoi ava ipihañemoñeta tupri vahe. Esepia niha, ahe osepiara Tũpa yuvireco curi.

9 “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tũpa.

10 “Sorivete catura acoi ava seco catupri rese imombaraisupri. Esepia, ahe chupe nara Tũpa mborerecuasa.

11 “Perorivete catura pe acoi ava iñehe-ñehe tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco.

12 Pe rumo peyembovihañora. Esepia, ivave tuvichá vahe porerecosa peipisira curi. Ëgüe ehi avei niha yipindar evocoi ava ramoi Tũpa ñehe mombehusareta mombaraisu yuvireco aracahe” ehi.

Jesús reroyasar aviye yucri iyavei tesapesa yuvirecoi ava upe

13 “Co ivi pipe pe aviye yucri peico opacatu ava upe. Yucri rumo nasehe irise, ndayaicatui imoehe iri ãgua, ndiporusai chietera; imombopasara ava pirunga ãgua yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi ãgua.

15 Iyavei ndayamoendi chira tataendi mbahevrive tẽi. Iyacatu rumo yasupi ivate sendave opacatu oi pipendar ava resape ãgua.

16 Pe ãgüe peye aveira pemboyecua ava eta upe pe recocuer aviye vahe. Ipipe sui tomboetei yande Ru Tũpa iva pendar yuvireco” ehi ava rehii upe.

Jesús oporombohe Moisés porocuita rese

17 “Aní chira, ‘Co mbia revo oporombohe Tũpa ñehe mombehusar rembicuachía mboyeroyaēhi āgua iyavei Moisés porocuita cuachiapri mboyeroyaēhi āgua avei no’ peye tēi cheu. Ēgüe ehi rumo che ayu imboaviye āgua.

18 Supi eté co iva, ivi avei yandeu oime vitemiseve, ndipoi chietera que ñepeí yepe Moisés porocuita, que ambuae Tũpa ñehe mombehusar rembicuachiagüer ocañi tēi vaherã; ñepeí-peí porocuita imombehupri imboavíyesaño itera.

19 Sese acoi ava ndovíroyai vahe que ñepeí mborocuitamira viña, ombohe avei ava seroyaēhi āgua, ahe evocoiyase ivi coti catu vahe aveira Tũpa mborerecuasave yuvírecoi. Acoi víroya vahe rumo Tũpa porocuita yuvíreco iyavei oporombohe vahe yuvíreco sese, ahe evocoiyase Tũpa osecomboivate catura omborerecuasave curi.

20 Iyavei amombehu pēu: acoi pe reco ívi tupriisa ndaheise avíye catu vahe fariseo recocuer sui iyavei ndaheise avíye catu vahe Moisés porocuita rese oporombohe vahe recocuer sui avei, ahese ndapeiquei chietera Tũpa mborerecuasave” ehi.

Jesús oporombohe ñemoíroēhi āgua rese

21 “Pe peicua acoi pe ramoí aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi.

22 Che rumo aipo ahe pēu: acoi ava ambuae ava rese oñemoíro vahe yuvíreco, ahe avei serasosara

aheve. Iyavei acoi ‘nde ãgüe ere tõi vahe eico’ ehi vahe ambuae ava upe, ahe serasosara porandu ãgua mborerecuar ivate catu vahe rovai. Acoi ava rumo oñehe marase seroĩrosave ambuae ava upe, ahe iyacatu imondosa ité tata guasuve.

²³ “Sese Tũpa upe pe porerecosa reropovẽhesave tũparo pipe pemahenduhase ava pe amotarẽhimbar rese,

²⁴ peseya rane pe porerecosa aheve; peyevi rane pe amotarẽhimbar upe pẽu iñero ãgua rese. Acoi peñerose oyeupe, ahese voi peyevi, tapeicuavẽhe pe porerecosa Tũpa upe.

²⁵ “Iyavei peyeamotarẽhise, peñero voi oyeupe peyoepiase. Anise, aviyeteramo coiye catu tẽise pe mombehu tẽira pe amotarẽhimbar mborerecuar upe pe reraso ãgua. Ichui aviyeteramo ahe pe roquenda ucara.

²⁶ Supi eté aipo ahe pẽu: Ndapesõi chietera acoi peyemboepipase voi eté pesẽra ichui” ehi.

Jesús oporombohe yemboaguasaẽhi ãgua rese

²⁷ “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe.

²⁸ Che rumo aipo ahe pẽu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

²⁹ “Iyavei inungar que pe resa pe acato cotindar oipota rai ucase mbahe pẽu pe mboangaipa ãgua tõi, iya penose ité, pemombo amombrĩ peyesui. Aní pe mondo uca opacatu pe recocuer tata guasuve.

³⁰ Iyavei inungar que pe po pe acato cotindar pe mboangaipa ucase, iya peyasĩa ité imombo

amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi āgua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi.

³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopihañemoñeta tiētera güembireco mboaguasa uca āgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi āgua rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi.

³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda;

³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua.

³⁶ Pe āca rer pipe avei ndapeñehei chira. Esepia, ndapeicatui chira que ñepeí pe ha momorochi āgua, imou āgua avei.

³⁷ Sese niha peñehese, ñepeí reseve, ‘Aviye’ peyera; anise, ‘Aní’ peye voirá. Esepia, aipo ndehi vahe mbahe tēi” ehi.

Jesús oporombohe yande amotarẽhisar upe mbahe tẽi mboyeveĩhi ãgua

³⁸ “Peicua acoi Moisés porocuita aracahendar aipo ehi vahe: ‘Que ava vınose vahe ambuae ava resa ichui, ahe sesa avei senosesara. Iyavei vınose vahe sãi ichui, sãi avei senosesara’ ehi vahe.

³⁹ Che rumo aipo ahe pẽu: Aní chira pemboyeveĩ pẽu mbahe tẽi aposar upe. Acoi que pe amotarẽhisar pe rovapetese yuvireco, ambuae coti pe rova avei pemoporẽhiñora chupe.

⁴⁰ Porandusave pe rerasose pe camisa rerocua ãgua yuvireco pe sui, pe saco avei pemondoñora chupe.

⁴¹ ‘Ñepeĩ legua rupi evosii co mbahe rese cheu’ ehise que ava pẽu, pe rumo perasoñora ñuvirio legua rupi chupe.

⁴² Iyavei oporanduse que pe mbahe rese yuvireco pẽu, pemondoño avei chupe. Aní chira perecatẽhi sese” ehi.

Pesaisu pe amotarẽhimbar

⁴³ “Iyavei pesendu ñehesa yipindar: ‘Pesepia potai rene pe amotarẽhimbar, pe mboripar güeraño pesaisu’ ehi vahe.

⁴⁴ Che rumo aipo ahe pẽu: Pesaisu catu pe amotarẽhimbar iyavei peyeroqui pe momara potasar rese.

⁴⁵ Evocoi nungar apo pipe pe Ru Tũpa iva pendar rahir ité peicora. Ahe niha osesape uca arĩ ava naporai vahe upe, ava aviye vahe upe avei. Om-bou avei amar seco catupri vahe upe, ava ndaseco põrai vahe upe avei.

46 Pe raisupar güeraño pesaisu catu tēise, ndapeipisi chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi.

47 Ndahei yande mboripar upe güeraño yaya-pora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi.

48 Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo āgua rese

1 “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisi chietera pe Ru Tūpa iva pendar porerecosa.

2 Evocoyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbĩ omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: ěgüe ehi vahe rumo opa voi oipisi porerecosa co ivi pipe tēi yuvireco.

3 Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña.

4 Pe porereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure ãgua rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opũha-pũha catu tũparo pipe oyeruqui yuvireco cupiha yacatu avei ‘tayande repia angahu ava’ ohesa pipe tẽi. Supi eté che aipo ahe pẽu: Ëgüe ehi vahe opa voi eté co ivi pipeve tẽi oipisi porerecosa yuvireco.

⁶ Iyacatu rumo pe, peyeroqui potase, peiquera pe rêta pipe peyeoquendara pe ae pe yeroqui ãgua pe Ru Tũpa upe. Evocoyase pe Ru Tũpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tũpa upe inungar ava Tũpa ndoicuai vahe. Ahe omboyevi-yevi oyeruresa ‘Tũpa revo co rupi yande mboyeroya voira’ ohesave yuvireco viña.

⁸ Aní chira inungar tẽi peico. Esepia, pe Ru Tũpa oicua pe porandu renondeva mbahe ipane vahe pẽu.

⁹ Sese aipo peyera peyeroqui:
‘Ore Ru Tũpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.
Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarẽhimbar upe.

¹³ Ore mboangaipa ucai rene eve; eipeha mbahe naporai vahe ore sui’ peyera.

14 “Esepia, pe amotarēhimbar upe peñerose, pe Ru ìva pendar avei iñerora pēu;

15 ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

16 “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco.

17 Pe rumo peyecuacuse, peñeaca mondoro tuprira, peyovai tupri aveira.

18 Evocoyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepiai vahe, güeraño oicuará pe yecuacusa. Ahe evocoyase iporerecora pe rese curi” ehi.

Mbahe porañeté vahe oime ivave

19 “Ndapemonuha atii chietera mbahe pe rembiereco co ìvi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tēi opochi ati-ati oapocatusave, imonda vahe avei evocoyase imondaño sese pēu.

20 Iya peseca catu tecocuer aviye vahe ivave nara. Aheve niha ndipoi chira co ìvi pipendar nungar pe reco mocañi ãgua.

21 Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ìvi pipe, anise que ivave avei” ehi.

Yande resa inungar tataendi yande recocuer uve

22 “Iyavei yande resa inungar tataendi yande retecuer upe. Evocoyase yande resa aviyese, opacatu yande retecuer upe osesape;

23 acoi imarase rumo, opacatu yande retecuer pĩtumimbisave tēi seci. Tesapesa oime vahe yande rese, ahe ogüese rumo yande sui, mbahe tēi eté, pĩtumimbi nungar opacatu yande recocuer upe” ehi.

Guarepochi pota raisa; Tũpa mboyeroyaẽhisa

24 “Iyavei ndipoi chietera que ava ñuvirío güerecur omboyeroya vahe. Esepia, ñepei oyamotarẽhira imboyeroya potaẽhisa pipe, ambuae evocoyase osaisu catura imboyeroysa pipe. Ëgüe peye avei, ndapeicatui Tũpa mboyeroya guarepochi pota raisa pipe” ehi.

Tũpa osãro guahireta

25 “Iyavei ndapeyemomahenduha guasu ai chira mbahe pe remihura rese pe recove ãgua, pe ihu ãgua rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.

26 Pesepia vĩrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tũpa i va pendar ité niha omoime mbahe itohu. ¡Pe rumo ivate catu vahe ité peico vĩrai sui!

27 Ndipoi que ñepei pe pãhu pendar oicatu vahe opĩhañemoñetasa pipe tēi güecocuer mopucu iri ãgua.

28 “Ndahei chira pe turucuarã rese tēi peyemomahenduha guasu ai. Pemahecua ru mbahe

potri caha pipendar rese: ndoporaviqui eté iyavei ndoipiai oturucuarã.

²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

³⁰ Tũpa niha omboporañete raimi tõi mbahe potri caha pipendar, moviro ari tõi yasepia, ichui sapisapaño horno pipe. ¡Ahe rumo omondo catura turucuar pẽu, pe ava nimbahe reroya tupri vahe!

³¹ Sese, ‘¿Mbahe pĩha yahura, yaihura?’ Iyavei, ¿mbahe pĩha yamondera?’ ndapeyei chira pe yemomahenduha guasu aisa pipe.

³² Ava Tũpa reroyasarẽhi aipo nungar reseño tõi ipihañemoñeta yuvireco yepi. Pe Ru Tũpa iva pendar rumo oicua ité pẽu mbahe ipane vahe.

³³ Pemahenduha rane Tũpa rese pe recocuer tupri pipe ipovrive mbahe pe yapo água semimbotar rupi, ahese omboura opacatu co mbahe ipane vahe pẽu.

³⁴ Peyemomahenduha guasa ai eme mbahe peyapo vaherã rese. Iyacatu rumo ahe ari oye-potase voi, peyemomahenduhara sese. Esepia, ari yacatu rupi oime mbahe pemoingatu vaherã yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tõi ambuae ava upe; evocoyase Tũpa, ‘Oyavi mbahe’ ndehi chira pẽu.

² Esepia, inungar pe ambuae ava upe peico, ãgüe ehi aveira niha Tũpa pẽu.

³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!

⁴ Ndiyai pēu, ‘Che toropĩtivii mbahe nde rembiavi rese’ peye vaherã chupe. Esepia, ¡pe peyavi guasu catu mbahe ichui!

⁵ ¡Pe Tũpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchĩ nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peoporandu Tũpa upe pēu mbahe ipane vahe rese

⁷ “Peoporandu mbahe rese Tũpa upe, ahese omboura pēu; peseca ahe mbahe, ahese peyosura; inungar pemota oquenda, ěgũe peyera pe yeroquisa pĩpe Tũpa upe, ahese imbousara pe porandusa pēu.

⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pĩpe omota vahe oquenda Tũpa upe, chupe imboisara.

⁹ “Ndipoi eté revo que ñepepe pe pãhu pendar omondo vaherã ita tēi guahir upe pan rese oyeupe poranduse.

¹⁰ Que pira rese oyeupe poranduse revo, ndomondoi chaveira mboi tēi chupe.

¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviyeva vahe.

ꞑTahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaheṛā pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso;

¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ívira aviye vahe icuasa iha rese

¹⁵ “Coíye yugüerura ava Tūpa Ñhengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.

¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ívira sāchi atí vahe sui.

¹⁷ Evocoiyase ívira aviye vahe, iha aviye avei; ívira naporai vahe, iha naporai avei no.

¹⁸ Esepia, ívira aviye vahe ndovirecoi oha naporai vahe, iyavei ívira naporai vahe ndovirecoi oha aviye vahe.

¹⁹ Sese opacatu ívira iha naporai vahe yasiasa yepi. Ichui imondosapa tatave.

²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru ìva pendar remimbotar aposar año tupri rumo yuviroiquera aheve.

²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu.

²³ Che rumo, ‘¡Aní, ndopocuai! ¡Pe mbahe tēi peico vahe, peyepēpi che sui!’ aheñora aipo nungar upe” ehi.

Ñuvirío oĩ apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güëtarã.

²⁵ Yepe ahe oĩ upe oyepota tēi ivitu ai, amarusu reseve, ichui oyeapo tēi avei ìai chupe, oĩ rumo ndoviapi eté. Esepia, ita harive ité yaposa.

²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güëtarã.

²⁷ Ipare rumo oyepotase ivitu ai amarusu reseve chupe, ndaracaheimi ahe oĩ omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe.

29 Esepia, ndahei Moisés porocuita rese oporombohe vahe nungar; ahe rumo oporombohe güeco pĩratasa pĩpe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi.

² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavêhe nde porrecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵ Ipare Jesús oguataño, ãgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe

⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tẽi ombaherasisa ou —ehi.

⁷ —Aviye, cūritei evocoyase asora imbogüera —ehi.

⁸ —Aní, che Yar, ndiyai eté che rẽta pĩpe nde reique ãgua; iyacatu niha cohapeve ereñeheño tẽi

icuera ãgua. Evocoyase nde ñehe pipe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehi upe:

—Yepe ahe ndahei vahe judío viña, opacatu Israel recua pīpendar rumo ndasepiai eté ava imbahe reroya vahe yuvireco yepi co ava nungar.

¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye.

¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou.

¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco ãgua.

Jesús ombogüera setá ava imbaheasi vahe

¹⁶ Ipare pĩtu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tẽi omombopa caruguar ava rehii sui, iyavei opacatu imbaheasi vahe ombogüera avei no.

¹⁷ Ëgüe ehi omboavĩye Tũpa ñehe mombehusar Isaías rembicuachiagüer aipo ehi vahe aracahe: “Ahe ae vırocuva opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tẽi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi.

¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevei chupe:

—Yavaira rumo ndeu. Esepia, vırai vireco guaiti, iyavei aguara vireco oquesa; che rumo, Ava Riquehı, ndarecoi que che rẽta ité che pituhu ãgua yepi —ehi.

²¹ Ipare ñepei ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Anı, cũritei voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivıtu ai, ohıtu vahe avei

²³ Ipare Jesús yuviroha güemimbohe reseve yuvıraso carite pipe.

²⁴ İpa pıpe yuvıraso pucu ramoseve Jesús oque ou. Ahese aviyeteramo tēi ivıtu ai opūha İpa pıpe; i ohıtu vahe ndiguayıi eté, seni-seni carite oyopi.

²⁵ Evocoyase semimbohe yuvıraso voi imom-
ahe:

—İOre Yar, yande rerasora mo co carite İpıve!
İYande pısiro eve! —ehi yuvıreco chupe.

²⁶ Evocoyase aipo ehi:

—İMahera pesiquıye! İNdapeyeroyai eté che rese!
—ehi güemimbohe upe.

Ahese oñarapuha aipo ehi itu guasu upe, ivıtu ai upe avei no: “Pepıtuhupa” ehi. Aheseve voi opa tuprı opıtuhu yuvıreco.

²⁷ —İMara ehi rutei pıha co? —ehi tēi semimbohe yuvıreco chupe—. İMara ehi vahe pıha co ava secıi?

Esepia niha, ivıtu, para guasu avei omboyeroya yuvıreco no —ehi.

*Jesús omboyepıpa carugar Gadara pendar
sui*

²⁸ Jesús oguataño güemimbohe eta reseve oye-
pota İpa rovai Gadara ivı rese yuvıraso. Aheve ñuvırío ava carugar vıreco vahe yugüeru so-
vaıchi. Ahe ava tehögüer ruvıpa rupi tēi yuvırecoi
vahe, iyavei ndıporomboetei vahe yuvıreco. Ichui
osıquıyepave ava ndoguata potai ahe perı rupi
yuvıreco yepi.

²⁹ Jesús repia ramoseve rumo, oñehe pırata
yuvıreco chupe aipo ehi:

—İJesús, Tūpa Rahı, eyepepi ore sui! Esepia niha,
ndoyepota vıteı arı nde ore mombaraisu āgua oreu
—ehi tēi yuvıreco.

³⁰ Namombriimi cuchi rehıi yuvırecoi ichui.

³¹ Carugar evocoyase aipo ehi yuvireco chupe:

—Ore mombopaño tēi eve evocoi cuchi rese — ehi.

³² —Aviye, peso —ehi carugareta upe.

Aipo hese, carugar opa yuvnose ava sui, yuviroique cuchi rehi aviterve. Ipare rumo cuchi ndayaracua iri yuvireco; iivi socuer rupi yuvinoña yuviraso, opa ipa pipe ocañi tēi yuvireco.

³³ Yuvinoña evocoyase cuchi rãrosar tecuave yuviraso opacatu mbahe güembiepia mombehu ava upe yuvireco.

³⁴ Ichui opacatu ava tecua pendar yuvnose ati Jesús upe, “¡Eso cohava sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve.

² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuita rese oporombohe vahe yuvireco chupe.

⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco!

⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie?

⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua — ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rêtave —ehi.

⁷ Ahese opñha voi, oso güêtave.

⁸ “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opĩratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui orose Jesús, che repia, che Roma pendar mborerecuar guasu upe guarepochi rero cuasa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe arĩ pipeve Jesús güemimbohe reseve yuviroique che rêtave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.

¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pãhúve tēi? —ehi seroĩrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopõsano vahe; imbaheasi vaheño rumo oseca yuvireco.

13 Peyap̄isaca icuachiap̄ri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhep̄ri tēi’ ehi. Esepia, ndayui ava seco catup̄ri vahe reca, ēgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

14 Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

15 Ahe rumo omboyev̄i ahe ava upe:

—¡Ndiyai eté ichohop̄ri mendasave ndoyembov̄ihai yuvireco imer oicovese ipãhuve! Oimera rumo ar̄i imer reraso ãgua ichui curi. Ahese ramo oyecuacura yuvireco cute —ehi.

16 “Ndipoi chietera revo que ava oturucuar cuacua oyapete vahe turucuar ip̄iasu vahe p̄ipe. Esepia niha, yapetesa ip̄iasu vahe oichohoño turucuar cuacua imondoro. Ichorosa evocoyase tuvicha catu-catuño ité.

17 Iyavei ndiyai ava uva ricuer p̄iasu oyapocatu siru mbahe p̄irer cuacua vahe p̄ipe. Égüe ehise, mbahe p̄irer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ip̄iasu vahe mbahe p̄irer ip̄iasu vahe p̄ipe yapocatup̄ri rumo oyoya ndoyemomari yuvireco” ehi.

Jairo rayri iyavei cuña Jesús turucuar rese opoco vahe

18 Jesús oporombohe v̄iteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opūha yuviraso güemimbohe reseve supí.

²⁰ Ahe pipeve cuña doce araviter rupi suvî ndopai vahe opoco saquicuei cotî iturucuar popî rese.

²¹ Esepia, ahe aipo ehi opîha pipe: “Yepe que iturucuar popî resemitêi apocora, acuerara rumo” ehi.

²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerrecuar rêtave, osepia omimbî vahe iyemoingatupase omano vahe tî ãgua, ava yaseho atise avei no.

²⁴ Ahese aipo ehi ava oyaseho vahe upe:

—Pesêpa cohava sui. Co cuñatai nomanoi; oque têi ou —ehi.

Ahe ava rumo opucaete atiño seroyaêhisave yuvireco.

²⁵ Ichui opa ava omose, ahese oique oi pipe oipopîsi cuñatai. Evocoyase ahe oñarapuha voi.

²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osêse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco.

³³ Ichui omosese carugar, iñhengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rereciar pĩratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tũparo yacatu. Omombehu tecovesa

aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no.

³⁶ Osepiase ava rehii, oiparaisuereco yuvireco. Esepia, ahe oñemosañõ tēi mbahe rasicuer pãhuve inungar ovesa ndovirecoi vahe guãrosar yuvireco

³⁷ Evocoiyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tēi.

³⁸ Sese peporandu mbahe miti Yar upe, ahe tomondo ava imonuha ãgua —ehi güemimbohe eta upe.

10

Jesús oiporavo doce tupri apóstol

¹ Evocoiyase, “Perio” ehi Jesús doce güemimbohe upe. Chupe omondo güeco pĩratasa caruguar ava sui imboyepepi ãgua iyavei iporombogüera ãgua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan;

³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo;

⁴ iyavei Simón, güecua rese secatēhi vahe pãhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu ãgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia,

inungar ovesa ocañi vahe, ãgüe ehi tõi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi.

⁷ “Judío recua rupi pesoseve, ‘Cõimi Tũpa mborerecuasa seci yandeu’ peyera imombehu.

⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pĩratasa ndasepii vahe. Sese peyapoño evocoi mbahe guarepochi pisiẽhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe rĩru, iyavei ambuae pe turucuar, pe pĩtaqui; peyesendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sõtave pepĩtami ranera. Pemboaviyese pe cuaita, ahese ramo pesora ichui” ehi.

¹² “Evocoyase peique ramoseve oi pipe, peyapora, ‘Avĩrave, Tũpa tape rovasa’ peyera chupe.

¹³ Acoi aviyese oi pipendar ava pẽu, ahe oipisira Tũpa porovasasa; acoi ndahaviyese rumo ava, ndoipisii chira Tũpa porovasasa yuvireco.

¹⁴ Acoi ndosendu potaise pe ñehe, ndape pisi potaise avei yuvireco, ahese pesẽño ahe oi pipe sui, anise tecua sui. Peipipetera pe pi ivi rãtachigüer sui, pesẽ pecua ichui ‘toipisi Tũpa ñemoirosa yuvireco’ pe yapave.

¹⁵ Evocoyase supi eté ari cañi oyepotase co tecua upe, ivate catura Tũpa ñemoirosa ava

Sodoma, Gomorra iɣuar upendar sui curi” ehi.

Yamotarēhiprira Jesús reroyasar

¹⁶ “¿Pesendu tupri che ñehe! Che opomondo ovesa nungar ava mbahe mimba oñaro ai vahe nungar pãhuve. Sese peresaeté tuprira peyese mboi nungar, iyavei inungar apicasu seco tupri vahe peicora.

¹⁷ Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otũparo pipe yuvireco,

¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei.

¹⁹ Acoi pe rerasose mborerecuar upe yuvireco, ‘¿Mbahe pñha amombehura chupe?’ ndapeyei chira; acoi peñehe potase rumo, Tũpa omondora pe ñehe ãgua pẽu.

²⁰ Esepia, ndahei chira peyesui tēi peñehe, pe Ru Tũpa Espiritu pemoñehe ucara.

²¹ “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca ãgua yuvireco che recocuer rese.

²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipĩsiropri yuvirecoira curi.

²³ Iyavei acoi pe mañeco tēise ñepepe tecuave yuvireco, ahese peyepipiñora ichui ambuae tecua pipendar upe che recocuer mombehu ãgua. Supi

eté Ava Riquehir oura ndapemboaviye viteiseve pe guatasa judío recua rupi.

24 “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.

25 Iyavei semimbohe, ‘Aviye ité’ ehiñora ombohesar osecoupitise. Êgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui p̄ha siquiyesara?

26 “Sese ndapesiquiyei chira ava pe amotarẽhimbar sui. Esepia, yaposa vahe imombehupirẽhi cũritei, icuasaño itera curi; iyavei mbahe ñomipri, icuasaño aveira no.

27 Acoi che amombehu vahe p̄tumimbisave p̄u, pemombehu ari pipe coiye, iyavei acoi amombehu vahe p̄uñomi, perosapucai pe r̄eta harive imombehu opacatu ava upe.

28 Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retecuer, yande hã reseve imocañi ãgua tata guasu pipe” ehi.

29 “Yamondo niha ñuvirío v̄iraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepei v̄iraimi” ehi.

30-31 “Sese pesiquiye eme. Esepia, pe niha ivate catu vahe ité peico opacatu v̄irai sui. Supi eté Tũpa niha oicua opacatu ñepei-pei pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru ìva pendar upe.

³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru ìva pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ìvi pipe’ ndapeyei chira cheu. Ëgüe ehi rumo che yusa omoime ucara yeamotarēhisa.

³⁵⁻³⁶ Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui.

³⁸ Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco água.

³⁹ Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.

⁴¹ Acoi ava oipisi tupri vahe ambuae ava Tūpa ñehe mombehugar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri.

⁴² Iyavei acoi omondo vahe que chīhi i sōhisa vahe que ñepeï seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca água

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese

³ imboporandu água: “¿Nde ité vo Tūpa Rembiporavo aipō sãrombri ereico? anise, ¿oime tie ambuae orosãro vaheerã?” ehi yuvireco chupe.

⁴ Ipare omboyevı chupe aipo ehi: “Peso, pemombehupa Juan upe mbahe pe rembiepia iyavei pesendu vahe.

⁵ ‘Ndasesapisoi vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevı yuvireco iyavei ava iparaısu vahe upe imombehusa pĩsirosa resendar ñehesa’ peyera chupe.

6 ¡Ovìharetera acoi ava oyeroyaño vahe che rese!” ehi Juan rupindar upe.

7 Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiata ivitu ombova-mbova vahe nungar pīha?

8 Anise, ¿pesepia tie iturucuar porañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rētave yepi.

9 Evocoiyase pesepiase, ¿‘Ava’ peye vo pe chupe? ¿Tūpa ñehe mombehusar ité pīha? Taa, ahe ité. Evocoi niha ivate catu vahe Tūpa ñehe mombehusar sui.

10 Ahe chupe ité Tūpa icuachiapri aracahendar pīpe aipo ehi:

‘Che amondora nde renondeve che ñehe mombehusar nde raperā moingatú ãgua’ ehi.

11 Supi eté ndipoi que ñepei ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

12 “Juan yusa suive tupri Tūpa povri pendar oiporara mbahe tēi yuvireco. Osãha-sãha ava opĩratasa pīpe imocañi ãgua.

13 Opacatu Tūpa ñehe mombehusar rembicuachía pīpe, Moisés porocuaíta icuachiapri pīpe avei imombehusa Juan yusa rupive co Tūpa mborerecuasa resendar.

14 Yepe yavaira seroya ãgua pēu viña, Juan rumo, Tūpa ñehe mombehusar Elías. Ahe imombehupri ou vahe.

15 Acoi ava osendu pota vahe che ñehe, toyapisacaño sese” ehi.

16 “¿Mbahe rese pīha amboyoyara ava recocuer cūrteindar? Esepia, co ava inungar acoi chīhivahe iguayī tēi vahe ocar rupi. Ipare oñehe pucu-pucu omboripar upe yuvireco aipo ehi:

17 ‘Oromoñehe tēi mimbī pēu, ndapepivoi eté rumo iyavei orosapucaí tēi sapucaisa vīharēhisa resendar pēu, pe rumo ndapeyasehoi eté’ ehi.

18 Esepia, ouse Juan Oporoāpiramo vahe, ahe ndohui tembihu sepīrusu ai vahe iyavei ndoihui uva ricuer ipīrata vahe, sese, ‘Co mbīa carugar vireco vahe oyese’ peye tuprī tēi chupe.

19 Coiye che ayu, Ava Riquehīr, acarū, aihu tuprī avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

20 Ahese Jesús oñehe pīrata moviro tecua pendar upe. Esepia, aheve acoi oyapo atī catu mbahe poromondiisa viña. Ahe pendar ava rumo ndosecuñaro potai eté güecocuerei Tūpa upe nara yuvireco. Evocoiyase aipo ehi chupe:

21 “¡Peparaīsu, ava tecua Corazín pendar! ¡Pe avei peparaīsu tecua Betsaida pendar! Esepia, acoi poromondiisa pe pāhuve yapoprī, yaposara yipive tecua Tiro, Sidón ve viña, co tecua pendar aracaheve anga omondera turucuar vīharēhisa resendar, tanimbu avei omondora oāca rese oangaipa mboasisa pīpe yuvireco viña no.

22 Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye.

23 Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondisa yapopri vahe pe pãhuve yaposara viña, cūrītei oime vitera ahe tecua viña.

24 Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

25 Iyavei ahe ari pipe Jesús oyerure: “Che Ru, aviye ndeu. Nde niha iba pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe.

26 Ëgüe ere niha mbahe nde remimbotar apo, che Ru” ehi.

27 “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira.

28 Peyu cheu opacatu icuerai vahe. Che amondora pe pituhu ãgua.

29-30 Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pëu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiëpoi. Evocoyase trigo rãhi oipohopohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tẽi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiëpoise yuvireco.

⁴ Ahe niha yuviroique ité tũparo pipe pan imboetipri Tũpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi.

⁵ ¿Ndapeyeroqui vo Moisés porocuita resendar pipe? Esepia, judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco.

⁶ Cũritei cohava oime ava ivate catu vahe tũparo sui.

⁷ Evocoyase pe ndapesenducuai eté Tũpa Ñhengagüer aipo ehi vahe: ‘Che aipota peporoparisuereco, aní chira peropovẽhepa porerecosa mbahe mimba tẽi cheu’ ehi vahe. Pesenducuse viña, ahese, “Oyavi mbahe”

ndapeye voi chira che remimbohe mbahe ndoyavii vahe upe viña.

⁸ Esepia, Ava Riquehir mbituhusa ari rereciar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oique judío tūparove.

¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pīha mbituhusa ari pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosoi chira senose viña?

¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva.

¹⁴ Evocoyase fariseo opa yuvinose yuvirasos oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoyase Jesús oicuae fariseo pihañemoñetasa, osē oso, ava rehii avei yuvirasos supi. Setá avei imbaheasi vahe ombogüera,

¹⁶ iyavei, “Che mombehui rene ava upe peyé” ehi.

17 Ëgüe ehi yaviyepa Tũpa ñehe mombehusar
Isaías remimombehugüer:

18 “Co ité che mboyeroyasar che rembiporavo.

Ahe asaisu etepri.

Sese ité ayembovıha.

Amondora che Espıritu chupe.

Ahe omombehu aveira mbahe ihıvi vahe opacatu
ava ivı pipendar upe.

19 Noiñehepoepi-epii chira ava, nasase-sasei tēi chi-
aveira; iyavei ndosendui chietera ava iñehe
ocar rupi.

20 Iyavei nomopei chietera que ñepeı patavımi
oyeapa vahe; nombogüei chiaveira tataendi
sātachiñomi tēi vahe.

Ëgüe ehira mbahe ihıvi vahe pıpe opacatu
secopıpa.

21 Evocoyase opacatu tecua pendar ava ndahei
vahe judıo oyeroyara yuvıreco sese’ ehi
Isaías aracahe.

*“Jesús vıreco carugar pıratasa oyese” ehi tēi ava
yuvıreco*

22 Ichui ava ndasesapısoi vahe, noñehei vahe
carugar rerecosar vıraso Jesús upe yuvıreco.
Evocoyase Jesús ombogüera. Ahese osareco,
oñehe avei.

23 Evocoyase opacatu ava oyepıhamondiısave
aipo ehi yuvıreco: “¿Tũpa Rembiporavo David
suindar pıha co?” ehi yuvıreco chupe.

24 Osenduse rumo fariseo, “Co mbıa carugar
rerecuar Beelzebú pıratasa pıpe tēi omboyepıpeı
carugar ava sui” ehi yuvıreco.

25 Oicuaño rumo ipihañemoñetasa. Sese aipo ehi: “Que mborerecuar guasu povri pendar ovavavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

26 Ēgüe ehi avei carugar. Esepia, serecuar omboyepēpise opovri pendar, ovavara oyeupe yuvireco viña. Evocoyase ahe oyemocañi tēira yuvireco.

27 Iyavei pe, ‘Beelzebú pīratasa pipe sui tēi omboyepēpi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepēpi carugar ava sui yuvireco? Tūpa pīratasa pipese, che avei evocoyase ayapo evocoi nungar ipīratasa pipe. Pe voya ae omboyecua pe ñehe pe rembiavi yuvireco pēu.

28 Che rumo Tūpa Espiritu pīratasa pipe amboyepēpi carugar ava sui. Sese cūritei pesepia ité Tūpa mborerecuasa.

29 “Iyavei no, que ava oique potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipare voi opara virocua imbahe ichui.

30 “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 “Sese ava upe oimera ñeroisa opacatu angaipa rese iyavei ñehe mara-mara tēi vahe upe avei. Co catu acoi ñehe-ñehe tēi vahe Tūpa Espiritu upe, ahe chupe ndipoi chietera ñeroisa.

³² Iyavei acoi ava oñehe-ñehe tēi vahe che, Ava Riquehîr rese, ahe chupe oimeño ñeroisa; acoi oñehe-ñehe tēi vahe rumo Espîritu amotarēhisave, ahe chupe ndipoi chira ñeroisa co ivî pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivîra, ahe iha aviÿera; nderemoatiro tupriise ivîra, ahe evocoiyase vîrecora oha naporai vahe. Esepia, ivîra icuasa iha rese.

³⁴ ¡Evocoiyase pe, mboi nungar tēi peico vahe, pe recocuer naporaise, ndapeicatui chira mbahe aviÿe vahe rese pe ñehe âgua! Esepia, pe piha pipe sui tēi osē pe ñehe âgua.

³⁵ Iyavei acoi ava aviÿe vahe oñehe tupri opîhañemoñeta catupriisa pipe; acoi ava recocuer naporai vahe rumo, opîhañemoñeta raisa pipe tēi oñehe.

³⁶ Sese ari cañi pipe opacatu ava opara omombehu oñehe-ñehe tēisa Tûpa rovai yuvîreco.

³⁷ Esepia, pe ñehe aviÿe vahe reprî peipisîra, pe ñehe naporai vahe reprî peipisî aveira” ehi Jesús.

Ava eta ndaseco pōrai vahe oporandu poromondiisa rese yuvîreco

³⁸ Evocoiyase fariseo iyavei Moisés porocuita rese oporombohe vahe aipo ehi yuvîreco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua âgua — ehi yuvîreco.

³⁹ Jesús rumo omboyevî iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua âgua

rese. Che rumo namboyecuai chira ambuae poromondiisa; Jonás recocuer rese güeraño opomahenduhara.

⁴⁰ Esepia, inungar Jonás secoi mbosapi ari pira guasu aviterve aracahe, ãgüe ehi aveira Ava Riquehir mbosapi ari ivivrive taira omano vahe pãhuve.

⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa ãgua. Esepia, Nínive pendar niha omboasise oangaipa, oyeve Tūpa upe yuvireco Jonás omombehuse Tūpa Ñehengagüer chupe. Cūrtei rumo oime Jonás sui aviye catu vahe pe pãhuve.

⁴² Iyavei ari cañi pipe cuña mborerecuar guasu irohi coti secua vahe porandusave, omombehura cūrteindar ava cañipa ãgua. Esepia, ahe ou amombri sui Salomón mbahecuasa rendu ãgua. Cūrtei rumo oime ivate catu vahe Salomón sui — ehi fariseo eta upe.

Carugar oyeve iri ava güeco agüerve

⁴³ “Iyavei carugar osése ava sui, uguata tēi ivi ipiru vahe rupi opituhu ãgua reca. Ipare rumo ndoyosuise, ipihañemoñeta,

⁴⁴ ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri.

⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ëgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvino hai. Ahe oñehe pota yuvireco chupe.

⁴⁷ Evocoyase mbia omombe hu Jesús upe:

—Nde si, nde rivireta reseve co ocarve yuvino hai. Ahe oñehe pota yuvireco ndeu —ehi.

⁴⁸ Ahe rumo,

—¿Ava pñha che si; ava pñha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta.

⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osẽ oi sui oso, uguapi ipa popive oĩ.

² Aheve ava oñemonuha atise yuvireco, oha carite pipe uguapi oĩ, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepi mbia osẽ omaheti oico.

⁴ Ahe otiapi-apise mbahe rãhi oso, moviro oiti peri rupi. Vĩrai ogüeyise rumo sese, opaño yuvirohu.

⁵ Iyavei moviro oiti ivi nayanai vahesave ita pãhuve. Sese cũriteimi sorĩ;

⁶ ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rãhi oiti yu pãhuve. Ahe yu rumo sori poyava catu yuvireco ichui. Sese opaño oyopi.

⁸ Ambuae rumo oiti ivi aviye vahesave, ahe setá iha imonuhasa; ñepe ihi sui osẽ cién iha, ambuae sui osẽ sesenta, ambuae sui treinta.

⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pãha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pẽu rumo Tũpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.

¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui.

¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tẽi, ndosepiacuai rumo yuvireco iyavei osendu tẽi, ndosenducuai avei yuvireco no.

¹⁴ Na ehi yaviye Tũpa Ñehengagüer Isaías remimombehu:

‘Pe niha pesendu tẽira, ndapeicuai chira rumo; iyavei pesepia tẽira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaẽhisave; ndoyemboesapiso avei sepia potaẽhisave.

Esepia, ndosenducua potai opiha pipe yuvireco cheu oyeve potaẽhisave ombogüera ãgua' ehi Isaías aracahe.

¹⁶ “Pe rumo perorivete ité sepiacuase, pesenducuae avei no.

¹⁷ Supi eté setá Tũpa ñehe mombehusar iyavei ava seco catupri vahe aracahendar osepia pota tẽi mbahe pe rembiepia, ahe rumo ndosepia eté yuvireco; iyavei osendu pota tẽi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti re-sendar

¹⁸ Ipare aipo ehi: “Peyapisaca omaheti vahe recocuer rese.

¹⁹ Acoi osendu tẽi vahe Tũpa Ñehengagüer imborerecuasa resendar, ipare rumo ndosenducuai, ahe inungar acoi mbahe rãhi oviapi vahe perirupi. Ipare rumo carugar ou chupe. Ahe ipiha pipe osendu vahe Tũpa Ñehengagüer opa tupriño omocañi ichui.

²⁰ Iyavei acoi mbahe rãhi seitipri ita pãhuve, ahe inungar ava recocuer yipiño osendu vahe, oipisi vahe avei vorivetesapipe Tũpa Ñehengagüer.

²¹ Ipare rumo inungar co mbahe miti ndovirecoi vahe guapo oviracua ãgua, ãgüe ehi avei evocoi nungar ava oimese mbahe-mbahe tẽi Tũpa Ñehengagüer sui chupe, cũriteimi seroyaẽhisave oyepepi ichui.

22 Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saiskusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.

23 Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepe-pepe sāhii sui osē que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

24 Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhii oñoti vahe rese.

25 Opacatu ava queseve rumo oyepota yamotarēhisar, caha tēi rāhii oñoti trigo pāhuve oso.

26 Acoi trigo iha potase, supive avei sorí caha.

27 Evocoyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhii aviye vahe ereñoti nde ivi pipe? ¿Que sui ru caha sorí ipāhuve?’ ehi yuvireco chupe.

28 Iyar rumo aipo ehi chupe: ‘Oime revo que che amotarēhisar’ ehi. Evocoyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi.

29 Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi.

30 ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaire oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhi che mbahe apocatusave yuvireco’ ehi ivi yar” ehi Jesús.

Yembohesa mostaza rāhi suindar

31 Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhi rese. Ahe mbia oñoti vahe oivi pipe.

32 Supi eté co mostaza rāhi tahimi catu opacatu ambuae mbahe rāhi sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehi oyapo guaitirā” ehi oporombohe.

Yembohesa pan mboapeposa sui

33 Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

34 Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe.

35 Co rumo na ehi Tūpa ñehe mombehusar rembicuachiagüer aviye āgua:
“Che añehese, amboyoyara che porombohesa ambuae mbahe rese.

Iyavei amombehura Tũpa ivi apo suive mbahe nĩporẽhi vahe” ehi.

Jesús omombehu tupri oporombohesa caha tẽi resendar

³⁶ Ahese Jesús, “Aviye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pãhuve caha oime vahe resendar yandeu’ oya.

³⁷ Evocoyase omboyevi chupe: “Acoi ava mbahe rãhi aviyee vahe oñoti vahe, ahe che, Ava Riquehi.

³⁸ Ivi mbahe miti rupa, ahe ava co ivi pipendar. Iyavei mbahe rãhi aviyee vahe, ahe ava Tũpa povri pendar; caha naporai vahe, ahe ava carugar suindar yuvirecoi vahe.

³⁹ Acoi yamotarẽhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tũpa rembiguai iva pendar yuvireco.

⁴⁰ Iyavei inungar acoi caha tẽi imonuhapri sapi ãgua, egũe ehi aveira ari cañi pipe coiye.

⁴¹ Evocoyase che, Ava Riquehi, che rembiguai iva pendar amondora opacatu ava ambuae omboangaipa uca vahe, mbahe-mbahe tẽi aposar avei rerocua ãgua che povri yuvirecoi vahe pãhu sui.

⁴² Ichui omondopara tata guasuve. Aheve oyaseho tẽira iyavei ombotere-tere tẽira guã yuvireco.

⁴³ Aheseve voi ava Tũpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe sep̄irusu ñomimbri sui yembohesa

44 “Evocoiyase Tūpa mborerecuasa oyoya tupri mbahe sep̄irusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua āgua mbahe sep̄irusu vahe pota raisa pipe” ehi.

Mboh̄ir sep̄irusu catu vahe sui yembohesa

45 “Iyavei Tūpa mborerecuasa inungar ava mbahe rerocuar oseca vahe mboh̄ir icatupri vahe yepi.

46 Ahe oyosuse mboh̄ir sep̄i catu vahe, oso opacatu ombahe mondo co sep̄i catu vahe rerocua āgua.

Pira mbohasa sui yembohesa

47 “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira.

48 Acoi savapipose pira mbohasa, vinose ivi ātasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco.

49 Ēgüe ehi aveira arī cañi pipe: ahese Tūpa rembiguai iva pendar yuvinosera opacatu ava ndaseco pōrai vahe mboyepēi āgua ava seco catupri vahe sui.

50 Evocoiyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ip̄iasu vahe iyavei ocuacua vahe sui yembohesa

51 Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

52 Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mbörerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

53 Oñehe pare, Jesús osẽ ichui

54 oyepota güecuave oso. Aheve ombohe ava judío tũparo pĩpe oico. Evocoyase ahe pendar ava oyepĩhamondĩi tẽi:

—¿Que pĩha co ava oyembohe catu ombahe-cua ãgua? iyavei, ¿mara ehi pĩha co mbahe poromondĩisa apo? —ehi yuvireco—.

55 ¿Ndahei vo acoi carpintero rahĩr tẽi? Ichi niha acoi María, iyavei yuvirecove tivri, ahe Santiago, José, Simón, Judas.

56 Seindri avei niha yuvirecove yande pãhuve. Evocoyase, ¿que pĩha oyembohera viña? —ehi tẽi yuvireco chupe.

57 Ipĩpe sui ndoviroyai yuvireco. Ahe rumo aipo ehi chupe:

—Tũpa ñehe mombehusar niha omboetei opacatu rupi yuvireco yepi. Secua pĩpendar, sêta pĩpendar ae rumo nombotei yuvireco —ehi.

58 Evocoyase, ahe ava viroyaẽhisa rese, moviro tẽi oyapo mbahe poromondĩisa ipãhuve.

14

Juan Oporoãpiramo vahe mano agüer

¹ Ahe arî rupî Herodes, mborerecuar guasu Galilea pendar, oyandu Jesús rerãcua.

² Evocoiyase aipo ehi opîtivîisar upe: “Juan Oporoãpiramo vahe revo ocuerayevî. Sese oyapo poromondiisa ipîrata vahe” ehi.

³ Esepia niha, yîpîndar Herodes Juan oipîsi, oñapîchî carena pîpe soquenda ãgua vivri Felipe rembireco Herodías sui tîi,

⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeyño rumo ava eta sui. Esepia, ahe, “Tûpa ñehe mombehusar secoi” ehi yuvireco chupe.

⁶ Acoi Herodes haragüer mboeteisa pîpe rumo aipo cuña Herodías membri osê opivoi ava rehi rembiepiave. Herodes upe evocoiyase aviye ai eté.

⁷ Sese ahe oyemoingatu ñepi reseve que mbahe oyeupe oporanduse imondo ãgua chupe.

⁸ Evocoiyase ahe cuñatai oyeupe osî remimombehu rupî, aipo ehi Herodes upe:

—Embou Juan Oporoãpiramo vahe ãca poratu pîpe cheu —ehi.

⁹ Aipo ñehesa nombovîhai eté Herodes; ndiya iri rumo, “Aní” ohe ãgua. Esepia, opacatu ava güemimborî eta rovaque aipo ehi. Sese, “Taperu chupe” ehiño.

¹⁰ Ahese oporocuai Juan ãca hasia ãgua soquendasave.

11 Ipare vıraso poratu pıpe cuñatai upe yuvıreco. Evocoyase ahe omondo osı upe.

12 Ahese Juan remimbohe oyepota yugüeru, vıraso sete ñoti yuvıreco. Ipare yuvıraso Jesús upe imombehu.

Jesús oyopoi cinco mil cuimbahe

13 Jesús oyanduse Juan manosa, ahese ahe ae oso ava porêhisave carite pıpe. Ava rehi rumo oyanduse, yuvınose voi güecua sui, ivı rupi yuvıraso osupiti secosave yuvıreco.

14 Evocoyase osêse carite pıpe sui, osepia ava rehi. Ahese oiparisuereco ava eta. Sese opa ombogüera imbaheasi vahe serasopri.

15 Evocoyase caharuse semimbohe oyemboya yuvıreco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecuatuciami rupi, ahe supi tovírocua mbahe güemihura yuvıreco? —ehi yuvıreco chupe.

16 —Aní, ndiyai yuvıraso. Pe pemondora mbahe semihura yuvıreco —ehiño chupe.

17 —Poyandepomi tēi rumo pan orovıreco iyavei ñuvıriomi tēi avei pira —ehiño semimbohe yuvıreco chupe.

18 —Peruño ave cheu —ehi güemimbohe upe.

19 Ipare aipo ehi ava rehi upe: “Peguapı capihi harıve” ehi. Evocoyase oipısi poyandepomi vahe pan, ñuvıriomi vahe pira. Ichui omahese ıva rese, “Avıye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvıreco.

²⁰ Evocoyase opacatu ava ocaru vahe ihĩtaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

²¹ Ahe cuimbahe ocaru vahe retacuer cinco mil. Cuña rumo iyavei chĩhivahe ndipapasai yuvireco.

Jesús oguata i hari rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe.

²³ “Aviye” ohe pare ava upe, oyeupi oso ahe ae ivitri rese oyeroqui ãgua. Pĩtuse chupe, opitaño aheve.

²⁴ Aheseve carite oso pucuse ipa popi sui, ivitu ipĩrata vahe osovaĩchi yuvireco. Sese ohitu vahe nambegüe-mbegüei ocua sese.

²⁵ Cõhe potase, oguata i hari rupi oso güemimbohe coti.

²⁶ Semimbohe i hari rupi iguatase, oyembosiquiye yuvireco ichui. Sese,

—¡Ndahei vo evocoi hãgüer secoi! —ehi yuvireco chupe.

²⁷ Güemimbohe upe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi.

²⁸ —Che Yar —ehi Pedro—. Nde ité ereicose, taguata i hari rupi vicho nde pĩri —ehi.

²⁹ —Erio ru —ehi chupe.

Evocoyase Pedro ogüeyi carite pipe sui, oguata i hari rupi. Osora ipĩri viña.

³⁰ Ivitu pĩrata repiase rumo, osiquiye ichui. Oso senise rumo ipive,

—¡Che Yar! ¡Che pĩsiromi eve! —ehi.

³¹ Ahese cūrīteimi voi oipīsi Pedro po rese, aipo ehi chupe:

—¡Chīhi tēi ereyeroya che rese! ¡Mahera ndereyeroya tuprii che rese! —ehi.

³² Oyuvīrohase rumo carite pīpe, opītuhu voi ivītu.

³³ Evocoiyase carite pīpe yuvīrecoi vahe oñenopiha sovai,

—¡Supi eté catu nde Tūpa Rahir ereico! —ehi yuvīreco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuvīraso.

³⁵ Opatatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvīreco. Evocoiyase vīraso imbaheasi vahe chupe,

³⁶ aipo ehi yuvīreco: “Topocomi tēi nde turucuar popi rese yuvīreco” ehi; evocoiyase opacatu sese opoco vahe, ocuerapa voi eté yuvīreco.

15

Porombohesa yande mboangaipa vahe resendar

¹ Oyemboya Jesús rese movīro fariseo iyavei Moisés porocuita rese oporombohe vahe, yugūeru vahe tecua guasu Jerusalén sui. Ahe oporandu yuvīreco chupe:

² —¡Mahera vo nde remimbohe ndoguatai yande ramoi aracahendar aracuasa rupi yuvīreco? ¿Mahera vo yande porocuita mboavīyeēhisa pīpe ndoyepoi ocaru āgua yuvīreco yepi? —ehi.

³ Jesús omboyevi aipo ehi chupe:

—Pe no, ¡mahera ndapemboyeroyai Tūpa porocuita pe ramoi aracahendar aracuasa rupi tēi pe guata āgua!

⁴ Esepia, Tūpa aipo ehi: “Pemboyeroyara iyavei peipītivira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe.

⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise,

⁶ ahese ndiyai eté ipītivii āgua chupe” peye. Ëgüe peye pe aracua raisa pīpe pemocañi Tūpa porocuita peyesui.

⁷ ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pīpe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuita tēi’ ehi Isaías rembicuachiagüer pīpe aracahe —ehi Jesús imombehu.

¹⁰ Ipare,

—Perio —ehi ava rehi upe—. Peyapisaca, pesenducua tupri che ñehe:

¹¹ mbahe oi que vahe ava yuru rupi nomboangaipa ucai. Mbahe osē vahe ava yuru pīpe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe rende yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru ìva pendar remiti, opara sapohosa curi —ehi—.

¹⁴ Ëgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira ovìapi ivìcuar pipe yuvìraso —ehi.

¹⁵ Evocoyase Pedro oporandu chupe aipo ehi:

—Emombehu tuprì catu iri mbahe eremombehu vahe oreu —ehi.

¹⁶ —¿Ndapesenducua vîtei avei catu pe co ñehesa?

¹⁷ ¿Ndapeicuai vo opacatu mbahe acoi ava yuru rupi oi que vahe oso yavìterve, ipare osẽ setecuer sui?

¹⁸ Ava pìhañemoñetasa sui osẽ vahe rumo iyuru rupi, ahe ava omboangaipa.

¹⁹ Esepia, ava pìhañemoñetasa sui osẽ pìhañemoñeta raisa, porapichisa, mendasa sui yemboaguasasa, nomendai vahe yemboaguasa tẽisa, mondasa, temira iyavei ava rese ñemoñeta tẽisa.

²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiẽhisa nungar —ehi.

Cuña ndahei vahe judía viroya Jesús

²¹ Ichui osẽ Jesús oso, oguata Tiro ìvi rupi, Sidón ìvi rupi avei.

²² Cuña cananea, Tiro, Sidón ìvi rese seci vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco carugar oyese! —ehi pucu-pucu ou chupe.

²³ Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe ovesa ocañi tẽi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che pĩtivimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osẽ oso ipa Galilea ivi. Ipare oyeupi ivitri rese uguapi oĩ.

³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndas-esapiso vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera.

31 Ichui ava niñehengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoï vahe osareco yuvireco. Sepiase ava rehiï oyepihamondiï aipo ehi: “Imboeteipri Israel Tũpa tasecoï” ehi yuvireco.

Jesús oyopoi cuatro mil cuimbahe

32 Evocoyase Jesús oñehe güemimbohe upe aipo ehi:

—Iparaïsu catu co ava yuvireco cheu. Esepia, mbosapi ari yuvirecoï yande piri iyavei ndipoi eté mbahe semihura. Ndiyai sètave sie porêhi reseve amondo. Aviyeteramo oviroviapi-api tiêtera tieporêhi peri rupi yuvireco viña —ehi.

33 Evocoyase semimbohe aipo ehi yuvireco chupe:

—¿Que sui pĩha orosecara tembihu ava rehiï upe nara cohave ava porêhisave viña? —ehi yuvireco.

34 —¿Mbovi vo pan pereco? —ehi.

—Orovirecomi siete pan iyavei moviromi tẽi pirami —ehi semimbohe yuvireco chupe.

35 Evocoyase, “Peguapi ivi harive” ehi ava rehiï upe.

36 Ahese oipisi siete pan, pirami reseve, “Aviye ndeu” ehi Vu upe. Ichui omboyahoyaho güemimbohe upe imondo. Ahe evocoyase omondopa ava rehiï upe yuvireco.

37 Opacatu ava ocaru vahe ihĩtaro yuvireco. Ipare semimbohe omboapipo iri rane sumbirer siete iruova yuvireco.

38 Cuimbahe ocaru vahe retacuer cuatro mil. Cuña, chĩhivahe retacuer rumo ndicuasai.

39 Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha água yuvireco viña. “Emoporêhi Tûpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, ìva rese pîrá iteanga’;

³ iyavei añihivei: ‘Co pipe ari naporai chira. Esepia, ìva rese pîra vai anga, pîtu guasu-guasavei’ peye. Pe niha peicua mbahe ìva resendar têi oyecua vahe mombehu; ndapeicuai rumo mara oyapave co poromondiisa cûriteindar ava upe imombehu.

⁴ Co ava ndaseco pōrai vahe oyepepi vahe Tûpa sui oporandu poromondiisa rese ‘¿Tûpa suindar ité pîha?’ oyapave. Che rumo namboyecuai chira ambuae poromondiisa chupe; acoi poromondiisa Tûpa oyapo Jonás upe güeraño tupri aseyara chupe” ehi.

Ichui oseyapaño ava rehî oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ìpa rovai yuviraso. Pan sui rumo sesarai eté yuvireco.

⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité ñehe, Jesús rumo ñehe fariseo iyavei saduceo eta porombohesa rese tēi.

Pedro oicua uca Jesús Tũpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava ñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tũpa ñehe mombehusar mboetasa” ehi yuvireco ndeu —ehi.

15 —Pe no, ¿‘Ava co secoi’ peye ru pe cheu no? — ehi güemimbohe upe.

16 —Nde niha Tũpa supi eté vahe Rembiporavo imombeupri; Tahir ité ereico —ehi Simón Pedro.

17 —Nde sovasapri ereico Simón, Jonás rahir. Esepia, ndahei ava tẽi omboyecua co mbahe ndeu, che Ru iva pendar teieté omboyecua ndeu —ehi—.

18 Nde Pedro ereico, co ita guasu harive amopuhara che tũparoguã. Ñepe yepe manosa ndosecoreroyi chietera opĩratasa pipe.

19 Evocoyase che amondo Tũpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Aní” erese que mbahe uve co ivi pipe, ãgüe ehi aveira ivave —ehi.

20 Ipare Jesús aipo ehi güemimbohe upe: “ ‘Co Tũpa Rembiporavo Poropĩsiosar’ peye eme ava upe cheu” ehi.

Jesús omombehu omano ãgua

21 Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

22 Pedro rumo vıraso co cotimi chupe oñhengata ãgua:

—¡Tũpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esirî che sui, Carugar! —ehi Pedro upe— . Nde che reitî pota eve mbahe tēi pîpe. Esepia, nandepîhañemoñetai mbahe Tûpa upendar rese, ava nungar tēi nde pîhañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosîra viña, toyemoingatu voi che recocuer rese oparaisu âgua iyavei toguata tupri che rupi.

²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisîrora.

²⁶ Esepia, ¿aviye ai angahu pîha ava upe opacatu mbahe co ivi pîpendar pîsi âgua, ahe ae tēi omocañise güecocuer yuvireco viña? ¿Mbovi pîha omondora ava güecocuer repirã viña?

²⁷ Esepia che, Ava Riquehir, ayevîra che Ru reco pîratasa pîpe che rembiguai ïva pendar reseve curi. Che evocoyase aicuara ñepeî-peî ava rembiapo agüer rupi chupe.

²⁸ Supî eté oimera amove cohava ava nomano vîtei chivaherã, ahe che, Ava Riquehir, che repia rane itera che yevise che mborerecuasa pîpe yuvireco curi —ehi güemimbohe upe.

17

Jesús ñecuñaro agüer

¹ Seis arî pare Jesús vîraso Pedro, Santiago, tivri Juan reseve co coti ivitri ivate vahesave oyeupi.

² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei.

³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha.

⁴ Ahese Pedro aipo ehi chupe:

—Che Yar, javiye ai eté cohave yaico! Ereipotase, ayapora mbosapi teyupami: ñepei ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui.

⁷ Ahese oyemboya oso güemimbohe rese, oñatoi aipo ehi chupe:

—Pepũha; pesiquiyei rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu ãgua curi.

¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaísura ahe ava povrive vichico —ehi.

¹³ Evocoiyase semimbohe osenducua ramo iñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chñivahe carugar rerecosar

¹⁴ Viroyepota Jesús güemimbohe ava rehisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaísuerecomi tēira che rahir cheu viña. Esepia, ahe ipiha mbaheasi vahe, oye-mombaraisú iteanga. Setá yupagüer oviapi tatave, ive avei no.

¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chihivahe cheu —ehi.

¹⁸ Ahese oñehe pñrata carugar upe chñivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera pñha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tũpa rese. Supi eté sese pe yeroyasa, yepe ndoyavii chira mostaza rãhi tahimi vahe viña, aipo peyera co ivitri upe:

‘Esiri, eso coi coti’ peyera. Evocoiyase ivitri osiriño itera. Ahese ndapemboavaimi chira mbahe.

²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano ãgua

²² Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehi, imondopri aicora che amotarêhimbar povri.

²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tẽi yuvireco.

Jesús omondo guarepochi tũparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tũparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tũparo upe nara? —ehi.

²⁵ —Omboepi niha —ehi Pedro chupe.

Evocoiyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui piha, ambuae ava sui tie? —ehi.

²⁶ Pedro evocoiyase omboyevi chupe:

—Ambuae ava sui —ehi.

—¡Taa! —ehi—. Evocoiyase mborerecuar povri pendar nomboepi chira yuvireco —ehi—.

27 Guarepochi rerocuarar moñemoiroẽhi ãgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepegi guarepochi. Ahe eraso chupe. Ipipe iyacatura imboepi ãgua yandeu —ehi Jesús Pedro upe.

18

¿Ava vo seco ivate catu vahe?

1 Ahe arĩ pipeve semimbohe oyemboya Jesús rese yuvireco mbahe rese oporandu ãgua chupe:

—¿Uma vo seco ivate catu vahe Tũpa mborerecuasa pipendar? —ehi.

2 Evocoyase Jesús: “Erio” ehi ñepegi chĩhivahemi upe, omondo güemimbohe pãhuve imoha,

3 aipo ehi:

—Supi eté, acoi ndapeñecuñaroise iyavei ndapeicoise chĩhivahemi nungar, ahese ndapeiquei chira Tũpa mborerecuasa pipe.

4 Acoi oñemomini vahe rumo inungar co chĩhivahemi, evocoi nungar seco ivate catura Tũpa mborerecuasave.

5 Acoi ava oipisi vahe co chĩhivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

6 “Acoi que ava rumo omboangaipa uca vahe co chĩhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo ãgua.

7 ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepía, aviye catu peiquera tecove apirēhisave ñepeí pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve.

⁹ Iyavei pe resa pe mboangaipa ucase, penose, pemombo amombri peyesui. Esepía niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroĩroi rene que ñepeí chĩhivahemi che reroyasar. Esepía, ivave sembiguai che Ru pirindar ité yuvirecoi yepi” ehi.

¹¹ “Che niha, Ava Riquehir, ayu ava ocañi tēi vahe pĩsiro āgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso.

¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui.

¹⁴ Ēgüe ehi avei che Ru ivave secoi vahe, ndoipotai eté que ñepeí ava che reroyasar chĩhivahemi nungar cañi āgua” ehi.

Porombohesa yande ñero āgua rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe

nde uoyavi vahe rese chupe. Nde ñehe viroyase, ahese peñero oyeupe cute.

¹⁶ Nande reroyaise rumo, ahese ereñehera ñepei, anise ñuvirío ava upe nde pĩtivii ãgua rese. Ahe avei tosendu pe ñehe. Ahese oimera que ñuvirío, anise mbosapi sendusar.

¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tẽi aposar, ãgũe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; ãgũe ehi aveira ivave. Iyavei co ivi pipe, ‘Aní’ peyese que mbahe upe, ãgũe ehi aveira ivave.

¹⁹ “Iyavei co amombehu potami avei pẽu: Acoi ñuvirío co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pẽu.

²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipãhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagũer rupi pĩha? —ehi.

²² —¡Aní! —ehi—. ¡Setenta rupi siete oyupagũer! —ehi Pedro upe.

Yembohesa ava niñero potai vahe resendar

²³ “Tũpa mborerecuasa inungar mborerecuar guasu omoingatu pota vahe gũembiguai revesa chupe.

24 Evocoiyase omboepi imoingatu ãgua, ahese ipitiviisar güeru ireve ati catu vahe guarepochi rese chupe.

25 Ahe rumo ndovirecoi imboepi ãgua. Sese co mborerecuar oyocuai opitiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi.

26 Evocoiyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe.

27 Ahese oiparaisuereco, opoi irevesa sui.

28 “Aheseve voi rumo sembiguai osēse, osepia ambuae ondugüer oyeupe ndasetatupri vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi.

29 ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi.

30 Niñero potai eté rumo. ‘Tomboepipa rane ité orevesa cheu’ ehi soquenda uca.

31 Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco.

32 Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

33 ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

34 Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’

oyapave.

³⁵ “Indó, evocoyase ãgüe ehi aveira che Ru ìva pendar pëu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiẽhi ãgua

¹ Ipare Jesús osẽ Galilea sui, oso Judea ìvi rupi ari sãsa coti ìai Jordán rovai.

² Ava rehìi yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pïha opoi cuimbahe güembireco sui que mbahe tẽi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi?

⁵ Iyavei aipo ehi: ‘Sese niha cuimbahe omen-dase, oyepepira oyesupa sui güembireco rese ité yuvirecoi ãgua. Evocoyase ñuvirío yuvirecoira ñepi ava nungar’ ehi.

⁶ Sese ndahe iri ñuvirío, ñepi vahe ité yuvirecoira. Evocoyase ava Tüpa omomenda vahe oyese, ndiyai ava tẽi omboyepi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherã güembireco upe cuachiar poisa resendar opoi ãgua ichui? —ehi.

⁸ —Pe poreroyaẽhisa pipe niha Moisés ãgũe ehi pẽu. Yipĩsuive ité rumo Tũpa ndoipotai oyesui opoi ãgua yuvireco.

⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tẽi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgũe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tũpa ombou vahe sembiaporã, ahe güeraño osenducua yuvireco —ehi güemimbohe upe—.

¹² Esepia, oime pihañemoñetasa ava mendaẽhi ãgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tũpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chĩhivahe

¹³ Ipare ahe pendar güeru moviro chĩhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tẽi chĩhivahe?” ehiño serusar upe yuvireco.

¹⁴ Jesús rumo aipo ehi:

—¡Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru povrive —ehi.

¹⁵ Ipare omondo opo chĩhivahe harive osovasa. Ichui osẽ oso.

Mbia chĩhivahe imbahe eta vahe omoñeta Jesús

16 Mbĩa chĩhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco ãgua? —ehi.

17 —¡Mahera ereporandu cheu mbahe aviye vahe rese! —ehi—. Ñepeñño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

18 —¿Uma vo aipo mborocuaita? —ehi.

Ahese omboyevi chupe:

—‘Ndereporoyucái chira, nandeaguasái chira, nandemondái chira, nanderemirái chiaveira ambuae ava rese,

19 eremboyeroyara nde ru, nde si avei, eresaísura ambuae ava nde yeaisu nungar eico’ ehi icuachiapri pipe —ehi mbahe yar upe.

20 —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaherã? —ehi.

21 —Ereipotase mbahe tupri pipe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbĩa oyepepiñño ichui oviharēhisave oso. Esepia, mbahe yar ité secoi.

23 Evocoyase aipo ehi güemimbohe upe:

—Supi eté yavai eteanga imbahe eta vahe upe oique vaherã che Ru mborerecuasave.

24 Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo

yavai catu che Ru mborerecuasave sei que ãgua — ehi.

²⁵ Aipo iñehesa renduse, semimbohe oyepihamondii aipo ehi:

—¡Ava angahu pñha evocoyase oñepisirora yuviereco viña! —ehi yuviereco.

²⁶ Omahe güemimbohe rese, aipo ehi:

—Ava tẽi upe yavai aipo nungar mbahe apo. Tũpa upe rumo mbahe opacatú ndayavaimi eté — ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

²⁸ —Oime itera niha mbahe pẽu. Esepia, acoi ari oyepotase opacatu mbahe recuñaro ãgua, ahese che, Ava Riquehĩr, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese pepo-randura curi.

²⁹ Acoi opacatu ava oseya vahe güẽta, anise que viquehĩr, anise vivri, güeindri, que vu, anise osi, guahĩr, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirẽhi vahe.

³⁰ Seta vai rumo cũritei yipindar vahe, ipa tẽira yuvierecoi; setá aveira cũritei ipa tẽi vahe, yipindar yuvierecoira curi —ehi.

20

Yembohesa oporaviqui vahe resendar

1 “Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave.

2 Oyosuse ava, ahese omoingatu oyeupe oporaviqui vaherã upe ñepe arĩ mboraviqui repri imboepi ãgua. Ahese opa omondo ocove imboporaviqui.

3 İpare osē, oso añihivei, arivate catumi osepiã ocarusu pipe ambuae ava oporaviquisa ndovirecoi vahe,

4 aipo ehi chupe: ‘Peso, tapeporaviqui che uva tive. Amboepi tuprĩra niha pẽu’ ehi. Ahe evocoyase yuviraso oporaviqui ãgua icove.

5 İpare oso iri mbiter arĩ rupi oyeupe oporaviqui vahe reca, ěgũe ehi tupri avei caharuse, las tres rupi.

6 İpa osē iri las cinco pipe, aheve avei osepiã ambuae ava ndovirecoi vahe oporaviquisa yuvinoãa. Chupe aipo ehi: ‘¿Mahera peyembohĩ tẽi arĩ momba cohavẽ pehã?’

7 ‘¡Aní!’ ehi yuvireco, ‘Esepiã, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi.

8 “Pĩtu ramose, cove yar aipo ehi oporaviqui vahe rese yangarecuar upe: ‘Eñhepa ava oporaviqui vahe upe. Emboepi ipa yugũeru vahe upe rane iporaviqui yuvireco chupe. İpare tenondenar uve’ ehi.

9 Evocoyase las cinco pipe yuviroique vahe oporaviqui, ahe rane tenonde yugũeru. Oyacatu ñepepei ñepepei arĩ rupindar oipisi guarepochi yuvireco.

10 İpare tenonde catu yuviroique vahe oporaviqui, ahe chupe ipa tẽi imboepiã. Ahe

ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepei ari rupindar yuvireco.

¹¹ Guarepochi pisire rumo oñemoiro cove yar upe yuvireco,

¹² aipo ehi: ‘Co ava yugüeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tēi oroporaviqui ari momba sacucuer upe oroico’ ehi.

¹³ Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepei ari resendar ndeu acoi, Aviye, peye vahecuer rese cheu’ ehi.

¹⁴ ‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oi que vahe upe inungar tupri ndeu amboepi.

¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherã yuvireco curi” ehi güemimbohe upe.

Jesús omombehu iri omano ãgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ –Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei

Moisés porocuaita rese oporombohe vahe povrìve yuvìreco. Ahe, “Tomano” ehira yuvìreco cheu.

¹⁹ Ipare che mondora ava ndahei vahe yande mu upe mara-mara tēi che rereco ãgua che reroĩrosa pìpe. Ipipe che yucara curusu rese yuvìreco. Imombosapisa ari pìpe rumo acuerayevira —ehi.

Santiago, Juan si oporandu Jesús upe mbahe rese omembrì upe nara

²⁰ Ipare Zebedeo rembireco ñuvirìo omembrì reseve, oyemboya Jesús rese yuvìreco. Ahese oñenopiha sovai oporandu ãgua mbahe rese.

²¹ Evocoyase,

—¿Mbahe vo ereipotami? —aipo ehi ichì upe.

—Che aipota che membrì eremboguapira ndeyepiri ñepei nde mbahe rese pocosa cotì, ambuae nde mbahe rese pocoẽhisa cotì nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pñha co mbahe-mbahe tēi aiporara vaheerã, inungar-ra que igua iro vahe aihu vaheerã viña? —ehi.

—Taa, oroicatuño itera —ehi yuvìreco.

²³ —Supi eté peiporarara mbahe-mbahe tēi. Co rumo ndiyai cheu, che piri opomboguapì ãgua che mbahe rese pocosa cotì, ambuae che mbahe rese pocoẽhisa cotì avei. Che Ru rumo omoingatu güembiporavo upe nara oguapì vaheerã che ipìve —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei.

²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi.

²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaheerā ava eta repirā Carugar povri sui senose āgua —ehi.

Jesús ombogüera ñuvirío ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehi yuviraso saquicuei.

³⁰ Aheve peri popive ñuvirío ava ndasesapisoi vahe oguapi yuvinoi. Evocoyase osenduse Jesús ocuase supi, osapucái pĩrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaheerā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiskusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipare yuvirasofno ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirio güemimbohe

² aipo ehi chupe:

—Peso co tecuami yande rovaindarve. Aheve pesepiara guaricu imembrí reseve ñapichimbri imoha. Ahe peyorañora seru cheu.

³ Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ēgüe ehi chupe aracahendar Tūpa ñehe mombehugar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembrí reseve’ peyera” ehi.

⁶ Evocoyase evocoi semimbohe yuvirasofno, oyapo ité ocuaisa yuvireco.

⁷ Güeru guaricu imembrí reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive.

⁸ Iyavei ava rehii oipipira oturucuar perí rupi imboetei guasusa pipe. Ambuae evocoyase oyasia pindo omondo perí rupi yuvireco saperã.

⁹ Ava rehi senonde, saquicuei avei oguata vahe osapucái yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondií yuvireco. Iyavei setá oporandu-randu yuvireco:

—¿Ava pīha co mbia? —ehi tēi yuvireco.

¹¹ Ava rehií oguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipare Jesús oique judío tūparo guasu pipe. Ipipendar opa omombo ichui ava mbahe mondosar, mbahe rerocuar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo.

¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndas- esapisoí vahe, ipāri-pāri vahe avei. Ahe opa om-bogüera.

¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiái vahe sembiapo, iyavei tūparo

pípe osenduse chĩhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco

¹⁶ aipo ehi chupe:

—¡Eresendu vo aipo ehi tẽi vahe chĩhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pípe:

‘Chĩhivahemi, pĩtanimi avei osapucaira nde mboeteisa pípe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepeĩ pĩtu oque.

Jesús omomara ivira higuera ndihai vahe oñehe pípe

¹⁸ Ahere ayihive añihiveive, oyevisẽ tecua Jerusalén ve, Jesús ndasiepoi oico.

¹⁹ Aheve peri popive osepia ivira higuera. Ahe sese oyemboya oso ‘¿iha pĩha?’ oya viña. So güeraño tẽi rumo osepia. Evocoyase ahe aipo ehi chupe:

—¡Co pípe suive nandehai chietera! —ehi.

Aheseve voi opa ipiru.

²⁰ Ahe mbahe repiase, ore,

—¡Too, mara ehi rutei pĩha co cũriteimi opa voi ipiru! —orohe tẽi chupe.

²¹ Ahese omboyeveĩ oreu:

—Acoi peyeroyase ité Tũpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pípe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tũpa rese pe yeroyasa pípe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tũparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoiyase ahe aipo ehi chupe:

—Che avei aporandura mbahe rese pẽu. Pemboyevise che porandusa, ahese che avei amombehura ava porocuita rupi eté pĩha ayapo co mbahe vichico.

²⁵ ¿Ava vo Juan ombou ava ãpiramo ãgua? ¿Tũpa pĩha, ava tẽi tie? —ehi.

Evocoiyase oñemoñeta aipo ehi oyeupe yuvireco: “ ‘Tũpa ombou’ yahese chupe, ahe evocoiyase omboyevira yandeu: ‘¿Mahera ru evocoiyase ndaperoyai?’ ehira.

²⁶ Anise, ‘Ava tẽi remimbou’ yahese rumo, aviyeteramo opacatu ava yande amotarẽhira yuvireco. Esepia, opacatu: ‘Juan omombehu vahe ñehesa Tũpa suindar’ ehi eté yuvireco chupe” ehi.

²⁷ Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoiyase che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi.

²⁹ ‘¡Nachequerēhi!’ ehi voiño. Coiye rumo, ‘¿Maha herā ēgüe ahe?’ ehi. Ipare osoño ité, oporaviqui.

³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui.

³² Esepia, Juan Oporoãpiramo vahe ou co tecocuer ihivi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rīavii āgua; oyapo avei oi ivate vahe ahe sese mahemoha āgua. Ipare

oseya oivi ava oporaviqui vahe upe iporu ãgua. Ichui osẽ oso amombri vahesa rupi.

34 Coiye oyepotase ari uva pohosa, ahese omondo güembigui oporaviqui vahe upe imboporandu ãgua ‘taipisi uva pohopri cheundar cute’ oyapave viña.

35 Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco.

36 Ipare rumo ivi yar setá catu omondo iri güembigui. Oporaviqui vahe rumo mara-mara tẽiño avei vireco yuvireco.

37 “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña.

38 Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco.

39 Evocoyase oipisi, vinose miti pãhu sui, oyuca ité yuvireco” ehi.

40 “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

41 Ahe evocoyase,

—Opara revo oyuca saisuẽhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

42 Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri
ãgua.

Ëgüe ehi niha Yar yapo yande mohapisi ai eté'
ehi icuachiapri pipe.

⁴³ Sese che Ru Tüpa mborerecuasa serocuasara pe
sui. Ambuae ava upe rumo imondosara. Ahe
virasora che Ru mombaheesa chupe.

⁴⁴ Acoi que oviapi vahe evocoi ita harive, opa tẽira
ahe ae oyemomara; iyavei acoi oviapise evocoi ita
que ava harive, ahese opa tupri aveira omocañi —
ehi Jesús oñehe oyese.

⁴⁵ Acoi osenduse pahi rerecuar iyavei fariseo
yuvirecoi vahe, osenducua oyesendar ñehesa
yuvireco.

⁴⁶ Aheseve oipisi pota voi yuvireco viña.
Osiquiyeño rumo ava rehii sui yuvireco. Esepia,
opacatu ava ipihañemoñeta: “Co ité Tüpa pĩratasa
pipe oñehe” ehi yuvireco chupe.

22

*Jesús oporombohe carusa mendasa resendar
rese*

¹ Ipare Jesús oporombohe iri ambuae ava re-
cocuer rese aipo ehi:

² “Tüpa omborerecuasave inungar mborere-
cuar guasu guahir mendase oyapo pieta.

³ Ipare oyocuai güembiguai eta ‘ava ichohopri
upe toyugüeru cute’ oya. Ichohopri rumo ni-
querẽhi iri yugüeru aheve.

⁴ Ipare oyocuai iri ambuae güembiguai eta aipo
ehi: ‘Aipo peyera ichohopri upe: ¡Toyugüeruño
ité! Esepia, opa ité oingatu tembihu iyavei ayuca
uca tivi iyavei ambuae mbahe mimba iquirã vahe.

Che opacatu amoingatu. Sese toyugüeruño ité mendasave, ehi, peyera chupe' ehi güembiguai upe.

⁵ Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave,

⁶ ambuae rumo oipisi sembiguai mara-mara tēi sereco ãgua. Ahe ipipe oyuca yuvireco.

⁷ Evocoyase mborerecuar guasu oñemoiro etepri save omondo osundao eta co ava oporapichi vahe yuca ucapa ãgua, iyavei secua rapipa ãgua.

⁸ Ipare aipo ehi ambuae güembiguai eta upe: 'Opa oingatu tembihu mendasave. Co rumo yipindar ichohopri, ndiya iri chira yugüeru vaherã cohave.

⁹ Sese peso opacatu ava guata catusa rupi, peñehe mendasave yugüeru vaherã opacatu pe rovaichisar upe' ehi.

¹⁰ Evocoyase sembiguai eta yuvinosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ãgüe ehi ava savapipo tupri oi guasu mendasave yuvireco.

¹¹ "Evocoyase acoi mborerecuar oique ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei turucuar mendasa resendar.

¹² Evocoyase aipo ehi chupe: 'Che mboripar, ¿mara ere eique ave co turucuar mendasa resendar porẽhi?' ehi. Ahe rumo noñeheiño ité chupe.

¹³ Evocoyase, 'Peipisi co mbia, peñapichi ipi, ipo avei, pemose ocarve pĩtumimbisave. Aheve oyaseho tēira, sãitere-tere tēira mbaherasicuer rereco'

ehi ichohopri rese hañecosar upe.

¹⁴ Esepia, setá tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecōña iri tēi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua.

¹⁶ Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pihanemoñeta rupi ndereicoi vahe; nde pihanemoñeta rumo ñepei reseve erereco.

¹⁷ ¿Mara ehi nde pihanemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihanemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!

¹⁹ Pemboyecua ru ñepei guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tũpa upendar mbahe evocoyase pemondora Tũpa upe —ehi fariseo upe.

²² Osenduse, oyepihamondii tẽi yuvireco. Evocoyase yuvirase yuviraso ichui.

Saduceo oporandu Jesús upe cuerayevisa rese secoãhasave

²³ Ahe ari pipe saduceo “ndipoi eté cuerayevisa” ehi vahe yugũeru Jesús upe, oporandu tẽi angahu yuvireco chupe:

²⁴ —Porombohesar, Moisés aipo ehi aracahe:
‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. Evocoyase tivri omenda sembirecocuer rese.

²⁶ Ahe omano guahiẽhiseve avei no. Ëgũe ehi avei opacatu ambuae tivri, omano avei guahiẽhiseve yuvireco.

²⁷ Opacatu imano pare, cuña avei omano cute.

²⁸ Evocoyase opase ocuerayevi yuvireco, ¿uma rese ité pĩha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pĩhañemoñetasa co coti tẽi eté. Esepia, ndapeicuai eté Tũpa ñehe icuachiapri aracahendar, ndapeicuai avei Tũpa pĩratasa —ehi—.

³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai ÷va pendar nungar yuvirecoira ÷vave —ehi—

³¹ Co cuerayevisa resendar rumo amombehura pēu. Aviye ndapeyeroqui ÷i anga vahe acoi Tūpa omombehu vahecuer rese. Supi eté ahe aipo ehi aracahe:

³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipore fariseo oyanduse yuvireco Jesús omonguiriripañose saduceo oyesui, ahese oñemonuha yuvireco.

³⁵ Ñepe ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaísura nde Yar Tūpa opacatu nde pihañemoñetasa pipe, opacatu nde recocuer pipe, nde yapísacasa pipe avei’ ehi.

³⁸ Co porocuita aviye catu vahe ambuae porocuita sui.

³⁹ Imoñuviriosa inungar tupri avei aipo ehi no: ‘Eresaísura ambuae ava nde yeaísu nungar’ ehi.

40 Co ñuvirío porocuita rupi oguata opacatu Moisés porocuita icuachiapri, opacatu Tũpa ñehe mombehusar rembicuachía avei —ehi.

¿Ava suindar pĩha Poropĩsirosar?

41 Fariseo ñemonuha viteseve,

42 Jesús oporandu chupe:

—¿Mara ehi pepihañemoñeta acoi Tũpa Rembiporavo ou vaheĩ ava pĩsiro ãgua rese? ¿Ava suindarra pĩha secoi? —ehi.

—Ahe niha David suindar secoira —ehi fariseo yuvireco chupe.

43 Ahese aipo ehi fariseo upe:

—¿Mahera pĩha evocoyase David oñehese Espiritu pĩratasa pipe aracahe, “Che Yar” ehi chupe? Esepia, ahe aipo ehi:

44 ‘Yar aipo ehi che Yar upe:

Eguapi che acato coti acoi che amondose voi eté nde amotarẽhimbar nde povrive yuvireco’ ehi David aracahe.

45 Evocoyase, ¿mahera ru: “Poropĩsirosar David suindar secoira” peye, David teieté, “Che Yar” ehise chupe? —ehi fariseo upe.

46 Evocoyase ndoicatu iri imboyevi ãgua yuvireco cute. Ahe ari pipe sui ndipo iri que ñepe iquerẽhi vahe iñehe avi uca ãgua oñehe pipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no:

² “Co Moisés porocuita rese oporombohe vahe iyavei fariseo eta, ahe icuaita Moisés porocuita mombehu tupri ãgua yuvireco.

³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco.

⁴ Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeí oporocuita yuvireco no.

⁵ Oyapo angahu mbahe opacatu ava rembiepi-ave yuvireco yepi ‘tayande repia yuvireco’ oya-pave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco.

⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no.

⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyevri peico, iyavei ñepeíño ité pereco pe Mbohesar.

⁹ Iyavei, ‘Che ru’ ndapeyei chira que ava co ivi pipendar tēi upe. Esepia, ñepeíño ité pe Ru pereco, ahe niha íva pendar.

¹⁰ Ndiyai avei, ‘Mborerrecuar’ pembohe uca ava

peyeupe. Esepia, Poropĩsirosar güeraño ité pe rerecuar secoi.

¹¹ Acoi ava seco ivate catu vahe, ahe toporopĩtivii güeco mbegüesa pipe.

¹² Esepia, acoi oyemboivate ai vahe opara seco reroysa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tũpa povrive seique rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

¹⁴ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tũpa ñemoirosa ipĩrata catu vahe curi.

¹⁵ “¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tũpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

¹⁶ “¡Peparaisu catu itera, pe ava mbohesar ndasapisoi vahe nungar peico! Pe aipo peye tēi vahe: ‘Yamombehuse mbahe tũparo rer pipe yande ñehe mboaviye ãgua, ěgüe yahe tēi eté; co rumo yamombehuse mbahe oro tũparo pendar rer

pipe, ahese iya itera yamboaviye yepi' aipo peye tēi.

17 ¡Pe ndapembahecuai vahe nungar, ndas-
esapısoi vahe nungar avei peico! ¿Uma vo aviye
catu vahe: oro pıha, anise tũparo tie? Tũparo pipe
niha oro rovasasa yepi.

18 Iyavei co uve avei aipo peye tēi peico:
'Yamombehuse mbahe seropovēhepri renda
rer pipe yande ñehe mboaviye āgua, ēgüe yahe
tēi eté; co rumo mbahe yamombehuse mbahe
seropovēhepri renda hari pendar rer pipe yande
ñehe mboaviye āgua, ahese iya ité yamboaviyera
yande ñehe yepi' aipo peye tēi.

19 ¡Pe ndasesapısoi vahe nungar peico yepi!
¿Uma vo aviye catu vahe? ¿Evocoi porerecosa
seropovēhepri pıha, anise mbahe seropovēhepri
renda tie? Ahe tenda harıve niha porerecosa
sovasasa yepi.

20 Sese acoi mbahe omombehu vahe mbahe
seropovēhepri renda rer pipe oñehe mboaviye
āgua, ndahei serer pipe güeraño, omombehu avei
opacatu ihari pendar mbahe seropovēhepri rer
pipe,

21 iyavei acoi ava omombehu vahe mbahe
tũparo rer pipe oñehe mboaviye āgua, ahe
omombehu ipıpendar rer pipe avei. Ahe niha
Tũpa secıi.

22 Iyavei acoi omombehu vahe mbahe que
ambuae ava upe ıva resendar rer pipe oñehe
mboaviye āgua, omombehu avei Tũpa recua rer
pipe, Tũpa rer pipe avei. Esepia, Tũpa aheve ité
secıi.

23 “¡Peparaısu catu itera, pe Moısés porocuita

rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeipei diez pe remiti menta, anis, comino pereco vahe sui ñepe Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihīvi vahe, peporoparisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña.

²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ëgüe peye co mborocuita upe.

²⁵ “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ëgüe ehi tēi pe recocuer pe monda raisave, mbahe pota-pota tēisave avei.

²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrī tēi. Iharīve tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese.

28 Ëgüe peye: ava rembiepiave aviye pe reco ihĩvi vahe viña, pe piha pipe rumo oime pe porombopasa iyavei opacatu mbahe-mbahe tēi.

29 “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha ãgua iyavei pemoporañete ai tēi ava seco ihĩvi vahe ruvipagüer yepi viña.

30 Ipare aipo: ‘Yande yaicose revo aracahe yande ramoi recose, ndayaipĩtivii chietera Tūpa ñehe mombehusar yuca ãgua yuvireco viña’ peye tupri tēi.

31 Aipo peyese rumo, pemboyecua Tūpa ñehe mombehusarer yucasar suindar pe yesusa.

32 ¡Pemboyeapi iriño evocoyase pe ramoi rembiapocuerai!

33 “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve.

34 Evocoyase che amboura pēu Tūpa ñehe mombehusar ava yaracua vahe iyavei ava pe mbohe ãgua yuvireco viña. Amove rumo ipãhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi.

35 Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ĩvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe

tũparo pĩpe mbahe seropovẽhepri renda rovai.

³⁶ Supi eté opacatu co mbahe tẽi oura pe recove vitesevẽ” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tũpa ñehe mombehusar, ita pĩpe peyapi-yapi ava Tũpa remimbou yepi! ¡Setá rupi che opomonuha pota tẽi pe rereco, inungar tacura omonuha vahe omembri opepovrive! Êgũe ahe pota tẽi pe rereco viña, pe rumo ndapeipotai eté evocoi nungar pe rereco ãgua.

³⁸ Sese seyapirã tẽi peicora.

³⁹ Esepia, ndache repiai chira peye acoi, ‘¡Im-boeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tũparo guasu mocañi ãgua

¹ Ipare Jesús osẽ judío tũparo pĩpe sui oso. Ahe-seve ore semimbohe oroyemboya sese aipo orohe chupe: “¡Ore Yar, esepia co tũparo!” orohe.

² Ahe rumo:

—Supi eté amombehu pẽu: co opacatu pesepia vahe, ndipoi chietera que ñepi ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherã arĩ cañi renonde

³ Ipare Jesús oso ivitri Olivo ve oguapĩ oĩ. Aheve ore güeraño tupri oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese

rane vo icuasara nde yu ãgua iyavei ari cañi ãgua? —orohe chupe.

⁴ —Peicua catu, peyembopa ucai rene ambuae ava upe peico.

⁵ Esepia, setá ava yugüerura, ‘Che aico Tũpa remimbou ava pĩsiro ãgua’ ehi tẽira ava eta mbopa yuvireco.

⁶ Iyavei pesendura ñehesa vavasa resendar cohave iyavei que rupi. Ndapeyembosiquiyeyi chira rumo ichui. Esepia, ãgüe ehi rane itera niha; ndehi vitei chira rumo ari cañisa.

⁷ Esepia, ñepey i vi pĩpendar ovavara ambuae i vi pĩpendar rese oyeupe yuvireco. Ahese oimera tiavor, i vi riri opacatu-catu tẽi tecua rupi.

⁸ Opacatu evocoi mbahe rumo omboipĩ ramomi vahe mbahe tẽi porarasa.

⁹ “Ahese pe pĩsira yuvireco mara-mara tẽi pe rereco ãgua, pe yuca ãgua avei. Iyavei opacatu avava tẽi ndape ambotai chira che recocuer sui tẽi yuvireco.

¹⁰ Ahe ari rupi evocoiyase setá ava ndache reroya iri chira yuvireco. Ahe oyeamotarẽhira iyavei omondora ambuae omboetasagüer yamotarẽhimbar povrive yuvireco.

¹¹ Iyavei setá Tũpa ñehesha mombehusar angahu tẽi oimera, ahe ava ombopa-mbopa tẽira yuvireco.

¹² Ombouvicha catura mbahe-mbahe tẽi naporai vahe. Ipipe sui ndoyeaisu tupri iri chira ava yuvireco.

¹³ Acoi ava oyemoviracua vaheño rumo ari ipa vahe rupi, ipĩsiropri yuvirecoira.

¹⁴ Iyavei co ñehesa icatupri vahe Tũpa mborerecuasa resendar imombehusapa ranera opacatu

iví rupi icua uca ãgua. Ahese ramo oimera cañisa co iví pipe” ehi oreu.

15 “Tũpa ñehe mombehusar Daniel oicuachía mbahe-mbahe tēi aposa resendar oime vaheerã tũparo guasu maranehi vahe pipe aracahe. Ahe pesepiase oi maranehi pipe –acoi oyeriqui vahe, ahe tosenducua tupri yuvireco—,

16 evocoyase Judea ve yuvirecoi vahe toñemipa poyava ivitri rese yuvireco ichui;

17 iyavei acoi güëta harive yuvirecoi vahe ogüeyise, toi que iri eme güëtave ombahe reca;

18 iyavei acoi que rupi tēi yuvirecoi vahe, toyevi iri eme güëtave que oyeaosa renose ãgua yuvireco.

19 ¡iparaisu itera cuña ipuruha vahe, imembi pītani vahe avei yuvireco!

20 Peporandu Tũpa upe pe recua pipe sui pe sēēhi ãgua irohí pipe, mbituhusa ari pipe avei.

21 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar.

22 Iyavei nomombituhise Tũpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

23 “Iyavei que ava, ‘Esepia co Poropĩsirosar secoi’; anise, ‘Peve secoi’ ehise yuvireco pēu, aní chira peroya aipo ehi vahe.

24 Esepia, yugüerura ava ‘che Poropĩsirosar aico’ ehi tēi vahe iyavei ‘che amombehu vahe Tũpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco

pĩratasa mboyecua ãgua yuvireco. Ipipe osecoãhara Tũpa rembiporavo imbopa ãgua yuvireco.

²⁵ Opa aipo co senondeva amombehu pẽu.

²⁶ Sese que ava pẽu: ‘Pesepia pe ivi iporupirẽhisave secõi’ ehise, pesõi rene aheve seroyasave, anı chiaveira peroya acoi ‘pesepia co secõi oi pipe’ ehi vahe yuvireco.

²⁷ Che rumo inungar overa vahe sendi añihivei sui caharu coti ocua iva rese, ãgũe ahera che, Ava Riquehir, opacatu ava rembiepiave ayevi irise vitu curi.

²⁸ Esepia, mbahe rehõgũer reimesave, uruvu oñemonuha atı yuvireco yepi” ehi gũemimbohe eta upe.

Jesús yevi ãgua resendar

²⁹ “Ahe arı pipe mbahe-mbahe tẽi pare cũriteimi ndoyecua iri chira arı, yası avei ndosesape iri chira, yasıtata avei opara ovıapi iva sui iyavei iva resendar mbahe oririira yuvireco.

³⁰ Ahese oimera iva rese iporẽhi vahe che, Ava Riquehir, yu ãgua resendar. Evocoyase opacatu ava-ava tẽi co ivi pipendar oyaseho tẽira osiquiyepave yuvireco. Che repia aveira yuvireco agũeyise iva quiha rese che pĩratasa rendigũer porañetesa pipe.

³¹ Iyavei amboura che rembiguai eta iva pendar. Ahe evocoyase gũemimbi omoñehe pĩratara opacatu che rembiporavo co ivi rupindar que amombri rupi yuvirecoi vahe monuha ãgua” ehi.

³² “Peyembohera ivıra higuera recocuer sui: Co ivıra soqui ramose, yaicua cõimi arı sacu vahe yepota ãgua yandeu yepi.

33 Na ehi aveira p̄eu che ñehe rupi tupri mbahe pesepiase, sese peicuara cõimi eté che yevi ãgua.

34 Supi eté yuvirecove vitera ava osepia vahe co mbahe opase yaviye.

35 Iva, ivi opara ocañi, che ñehengagüer rumo imboaviyesa rane itera.

36 “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37 “Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde.

38 Yipive amarusu renonde, ahese ava ocaru, oiñu; guahir, guayri avei omomendaño yuvireco. Noé arca pipe seiquese, ãgüe ehi vite yuvireco.

39 Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo t̄ei amar oviapi imocañipa. Ëgüe ahe aveira che, Ava Riquehir, ayevi aviyeteramo t̄ei.

40 Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara.

41 Ëgüe ehi aveira ñuvirío cuña ohicho vahe upe: ñepe serasosara, indugüer rumo opitara.

42 “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui.

43 Iyavei peyapisaca tupri co rese: inungar acoi oi yar oicuae revo que hora p̄itu pipe imonda vahe yepota ãgua, ahese imahemohara sese güeta pipe seiqueẽhi ãgua viña.

44 Ëgüe peye aveira peyemoingatu che yevi ãgua rese. Esepia niha, che, Ava Riquehir, aporoesapiha tẽira vitu curi” ehi.

Mbiguai omboaviye vahe ocuaita, nomboaviyei vahe avei

45 “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güêta pipendar rese hañeco ãgua ‘tembihu tomondo che rẽta pipendar upe che porocuaita rupi’ ohesave.

46 Acoi omboaviyese ocuaita, ahese oviharetera güerecuar yevise.

47 Supi eté niha serecuar oyocuaira opacatu om-bahe rese hañeco ãgua.

48 Ahe mbiguai rumo ndipihaise ‘ndoyepota vitei chira revo che rerecuar’ oya,

49 omboetasa omboipi mara-mara tẽi sereco iyavei oyemboya caguar tẽi rese ipiri ocaru iyavei oihu tẽi ãgua.

50 Ipare rumo serecuar oyepotara imahemo-haẽhiseve.

51 Ahese omombaraisu catura, “Tinupasa, ava seco tupri ai angahu tẽi vahe nupasa nungar pipe’ ehira chupe. Ahese oyaseho tẽira, oyemoaitere-tere tẽi aveira” ehi güemimbohe upe.

25

Diez cuñatai ndaseco marai vahe resendar ñehesa

1 “Evocoi ari pipe Tũpa mborerecuasa inungarra mendasave diez cuñatai ndaseco marai vahe virasora tataendi ambuae cuña mevi pisi ãgua yuvireco.

2 Ipãhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco.

3 Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri ãgua yuvireco;

4 evocoi ipihañemoñeta tupri vahe rumo viraso yandi siru pipe guataendi reseve yuvireco.

5 Acoi ndoyepota apihaise cuña mevi, ahese sopesi tẽi yuvireco. Coiye opaño yuviroque yuvireco ichui.

6 Pĩtu mbiter senise rumo, osendu ñehesa aipo ehi vahe yuvireco: '¡Coi imevi turi! ¡Pesẽ ipisi ãgua cute!' ehi.

7 Evocoyase opacatu evocoi cuñatai oñarapuha voi iyavei omoingatu guataendi yuvireco.

8 Ahese nimahemohai vahe aipo ehi ambuae imahemoha vahe upe yuvireco: 'Pemboumi tẽi chĩhi pe yandi oreu. Esepia, ogũe pota ité ore rataendi' ehi tẽi yuvireco.

9 'Aní, ndiyai chira revo oromondo vaherã pẽu. Iyacatu revo peso imboepisave serocua peyeupe nara' ehi.

10 Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoyase saquicuerive voi omboya oquenda rãrosar.

11 Ipare oyepotase ambuae cinco cuñatai yugũeru aipo ehi yuvireco oi yar upe: '¡Emboimi tẽi oreu!' ehi tẽi yuvinoha.

12 'Aní, ndopocuai vahe ité' ehiño chupe.

13 "Pe evocoyase pemahemohara. Esepia, ndapeicuai mbahe ari pipe, mbahe hora pipe che,

Ava Riquehir, ayevirá” ehi Jesús oreu.

Ñehesa guarepochi mondosea resendar

¹⁴ “Iyavei Tūpa omborerecuasave inungar-ra ava mbahe yar oso ãgua renonde ivi amombrisave omonuha güembiguai oguarepochi rãro ãgua viña.

¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepe upe seco etegüer rupi-rupi. Ipare voi oso cute.

¹⁶ Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coipe oipisi catu iri ambuae cinco.

¹⁷ Inungar avei ambuae oipisi vahe dos mil, ichui oipisi catu iri ambuae dos mil.

¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coipe oyevisse serecuar, ahese oñehe güembiguai upe oguarepochi retacuer cua ãgua.

²⁰ Yipindar cinco mil guarepochi oipisi vahe ranguatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi.

²¹ ‘Aviye ité, nde mbiguai seco aviye vahe erico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi chupe.

²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi.

²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovevepirer tēi avei ereipisi ndeyeupe nara.

²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe.

²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui.

²⁷ Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyevi catumi ãgua viña’ ehi.

²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi.

²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui.

³⁰ Sese pemose co mbiguai ãgüe ehi tēi vahe ocarve pĩtumimbisave. Aheve toyaseho, tasãitere tēi oĩ’ ehira serecuar chupe” ehi Jesús oreu.

Jesús oura opacatu ava recocuer rese porandu ãgua

³¹ “Che, Ava Riquehir, ayevisé, opacatu che Ru rembiguai iva pendar reseve che reco ivategüer

pipe, ahese aguapira che renda porañete vahesave
ava recocuer rese porandu ãgua.

³² Evocoiyase ava opacatu tecua rupindar
imonuhasara che rovai yuvireco. Ahese aipehara
ava oyesui, inungar ovesa rãrosar oipeha vahe
ovesa cavara sui.

³³ Che evocoiyase ovesa aipehara mbahe rese
che pocosa coti, cavara mbahe rese che pocoẽhisa
coti.

³⁴ Ahese che mborerecuar ivate catu vahe aipo
ahera che acato cotindar upe: ‘Perio pe opacatu
che Ru sui sovasapri peico vahe, peique che Ru
mborerecuasa pipe; ahe acoi yipive ivi apo ramo
suive imoingatupri pẽu nara.

³⁵ Esepia, ndacheriepoise, pe evocoiyase pem-
bou mbahe che remihura; iyavei che huseise, pe
evocoiyase pembou taihu; che aguata tẽise pe re-
cua rupi vichico, pe avei oi pembou che que ãgua.

³⁶ Turucuar cheu ipanese, pe avei pembou che
turucuarã; chembaheasise, peso avei che piri; che
roquendasave peso avei che repia no’ ehi.

³⁷ Evocoiyase evocoi seco catupri vahe aipo
ehira yuvireco cheu: ‘Ore Yar, ¿mbahese vo nde
repiasa nanderiepoise eico iyavei imondosa nde
remihura? ¿Mbahese vo nde repiasa ndehuseise,
ipare imondosa tereihu?

³⁸ ¿Mbahese vo nde repiasa nde guatase ore re-
cua rupi, ipare nde monguesa ore piri, ipanese
nde turucuarã, ore aipo evocoiyase oromondo
nde?

³⁹ Iyavei, ¿mbahese vo aipo nde repiasa nembah-
heasise, anise que nde roquendasave, aheve aipo
oroso nde repia yepi?’ ehira yuvireco cheu.

⁴⁰ Evocoiyase che, mborerecuar ivate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo êgüe peye’ ahera.

⁴¹ “Ahese aipo ahera cute che mbahe rese pocoêhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirêhisave, evocoi imoingatupri opacatu carugar upe nara serecuar reseve.

⁴² Esepia, ndacheriepoise, pe evocoiyase: Yamondomi icaru âgua, ndapeyei eté cheu; che huseise, ahese, Yamondomi toi hu, ndapeyei avei cheu;

⁴³ ambuae tecua pipe aguata tẽise vichico, ahese, Eique che rêtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tẽi sepia, ndapeyei eté cheu’ ahera.

⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembraheasise, anise nde roquendasave, marase vo mbahe rese nande pĩtiviisai?’ ehi tẽira yuvireco cheu.

⁴⁵ ‘Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté’ ahera.

⁴⁶ Ahe ava yuvirasora Tũpa ñemoirosa apirêhi vahesave. Seco ïvi vahe rumo teco ori opaêhisave yuvirasora” ehi Jesús oreu.

Jesús yamotarēhimbar omboguai yuca āgua yuvireco

¹ Ipare Jesús aipo ehi oreu:

² —Pe peicua ñuvirío ari tēi ipane vite co Pascua pieta yepota āgua yandeu. Ahese che, Ava Riquehir, imondopri aicora che atica āgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave.

⁴ Aheve oñemoñeta: ‘Yambopa ipisi yuca āgua’ ehi yuvireco oyeupe.

⁵ Ahe rumo:

—Ndiyai pieta pipe ité yaipisi ava rehii yemondii guasuēhi āgua yandeu —ehi.

Cuña oipiyere Jesús āca rese mbahe sīacuá vahe

⁶ Jesús tecua Betania ve secoi, Simón lepra vireco vahecuer rētave.

⁷ Aheve mesave chiniseve, cuña vireco vahe mbahe sīacuá vahe siru reseve viroyepota chupe. Ahe oipiyere Jesús āca rese.

⁸ Orosepiase rumo oroñemoiro aipo orohe oreyeupe:

—¡Mahera vo co omocañi tēi!

⁹ Omondo vahe ité tie co setá guarepochi rupi ava iparaisu vahe pītiviī āgua viña —orohe tēi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu.

¹¹ Ava iparaisu vahe niha yuvirecoiño itera pe pãhuve. Che rumo ãgüe ndahe viteñoi chira vichico pe pãhuve.

¹² Esepia, co cuña oipiyere mbahe sãacuá vahe che rese che tĩ ãgua renondeve.

¹³ Supi eté aipo ahe pẽu: co ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarẽhimbar povrive

¹⁴ Ipare ñepei ore pãhu pendar, Judas Iscariote, oso, oñehe pahi eta rerecuar yuvirecoi vahe upe

¹⁵ aipo ehi:

—¿Mbovi rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvireco chupe.

¹⁶ Ahesa reseve voi oseca Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rõtave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sõtave Pascua pieta che remimbohe reseve, ehi ndeu’ peyera chupe —ehi.

19 Evocoiyase oyapo semimombehu rupi tupri ité yuvireco, omoingatu carusa Pascua pieta re-sendar yuvireco aheve.

20 Pĩtu ramomise, opacatu oroguapi mesave Jesús pĩri ore caru āgua.

21 Ore carusave aipo ehi oreu:

—Supi eté aipo ahe pēu: ñepei pe pāhu pendar che mondora che amotarēhisar upe —ehi.

22 —Che Yar, ¿che pĩha? —orohe-rohe tēi ñepei-peí ore yacatu ore viharēhisa pĩpe chupe.

23 —Omondo vahe opo che caro pĩpe, ahe che mondora che amotarēhisar upe —ehi—.

24 Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

25 Ahese Judas imondosavi oporandu:

—Ore Mbohesar, ¿che tie? —ehi.

—Taa, ¡nde ité niha ēgüe erera! —ehi chupe.

26 Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

27 Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui.

28 Esepia, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehĩ angaipa rese ñero āgua.

29 Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve.

³¹ Evocoyase Jesús aipo ehi oreu:

—Opara pemocañi che rese yeroyasa peyesui co pĩtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi vahe.

³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepipi chietera nde sui —ehi chupe.

³⁴ —Che rumo supi eté aipo ahe ndeu: co pĩtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tẽi chupe.

Jesús oyeriqui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohave; che aso ranera peve catumi, ayeriqui —ehi.

³⁷ Aheve viraso Pedro oyeupi iyavei ñuvirío Zebedeo rahir. Ahese oyandu oviharẽhisa oico.

³⁸ Evocoyase ahe aipo ehi chupe:

—Ndavĩhai eté. Esepia, che hã oyandu ité manosa. Pepita rane cohave iyavei pemahemohara pe yeroqui pipe che rese —ehi.

³⁹ Evocoyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe tẽi sui eve; tayapo eme ru che remimbotar tẽi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesi upe che rãro ãgua que ñepei hora che mondugüe ãgua peye!

⁴¹ Pemahemoha, peyeroqui mbahe tẽi pipe pe viapiẽhi ãgua. Supi eté pequerẽhi ité viña, pe retecuer tẽi niha nipiratai pẽu —ehi.

⁴² Ichui imoñuviriosa rupi oso iri oyerogui aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

⁴³ Ipare oyevice, osesapiha iri iqueseve ou. Esepia, sopesi nomboyeroyai eté yuvireco.

⁴⁴ Evocoyase oseyapa iri oso oyerogui ãgua imombosapisa rupi. Aipo ehi tupriño avei oyerogui Vu upe.

⁴⁵ Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive.

⁴⁶ Pepũha, yaso. Esepia, cõimi eté che amotarẽhisar upe che mondo vaherã secoi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepei semimbohe ore pãhu pendar, iyavei setá

iteanga ava yugüeru quise pucu, ivira reseve-seve supi. Ahe pahi eta rereciar yuvirecoi vahe judío rerecuareta porocuaita rupi oyapo yuvireco.

⁴⁸ Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi.

⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoiyase semimbohe secoi vahe supi vinose oquise pucu, oyasía pahi rereciar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco.

⁵³ ¿Ndereicuai vo aporanduse che Ru uve viña, ahe evocoiyase cūrítei voi omboura doce mil sui setá catu vahe güembiguai che repi ãgua viña?

⁵⁴ Ëgüe ehise rumo Tūpa Ñhengagüer icuachi-apri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehi upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tūparo pipe, ndapeyapoi eté co nungar cheu.

⁵⁶ Co rumo opacatu Ëgüe peye Tūpa ñehe mombehusar rembicuachiagüer mboaviye ãgua cute —ehi ava rehi upe.

Ahese voi opacatu oroñemosaiapa, oroseya ahe aetemi Jesús ava rehi upe imoha.

Jesús serasosa pahi rerecuar ivate catu vahe royai

⁵⁷ Ahese Jesús pisisar viraso Caifás rētave yuvireco, ahe pahi rerecuar ivate catu vahe seci. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no.

⁵⁸ Pedro rumo amombri rupive tēi osaquicue moña oso. Ëgüe ehi oyepota pahi rerecuar ivate catu vahe rēta rocar āchisave. Aheve oi que ipipe, iyavei oguapi oĩ sundao pāhuve ‘¿mara ehi etera pīha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapongapo uca tēi ava Jesús amotarēhisave yuca uca āgua yuvireco,

⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevī eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropĩsĩrosar ité nde ereico, Tūpa Rahĩr? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pẽu, che repiara niha peye che, Ava Riquehĩr, aguapise Tūpa mbahe mboavais-arẽhi acato coti, ayevisẽ avei iva quihã rese curi —ehi.

⁶⁵ Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tẽi eté iñhe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñhe-ñhe tẽisa cũritei.

⁶⁶ ¿Mara ehi aipo pe pihave? —ehi.

—Supi eté, oyavĩ mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete,

⁶⁸ aipo ehi yuvireco chupe:

—Nde niha aipo ereico Tūpa remimbou Poropĩsĩrosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbĩa” ehi Jesús upe

⁶⁹ Pedro evocoiyase oguapĩ sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upé imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tũpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tũpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe.

⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecur, judío rerecur avei oñemonuha ati oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborerecur guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tūparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeveĩ ãgua aipo ehi:

⁴ —Che ayemboangaipa tiēte vichico. Esepia, amondoño tēi mbia seco catupri vahe pēu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehōgüer tĩ ãgua’ oyapave yuvireco.

⁸ Sese cūrítei co ivi upe, “Ava ruvi repri tēi” ehi yuvireco yepi.

⁹ Ëgüe ehi co imboaviye ité Tūpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua.

¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi

tupri ité oyapo yuvireco” ehi Tũpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapongapo tēi yuvireco. Nomboyevei eté rumo iñehe chupe oyeepi ãgua.

¹³ Evocoyase:

—¿Nderesendui vo aipo co opacatu ndeu ñeheñehe tēisa? —ehi Pilato chupe.

¹⁴ Nomboyevei eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepei ava soquendapri renose ãgua Pascua pieta pıpe ava rehii remimbotar rupi yepi.

¹⁶ Aheve oime soquendapri mbıa icuapri vahe ité Barrabás serer vahe;

¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pıha, anise Jesús “Poropısirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pıpe sui imondopri secoise.

19 Pilato güendave chini viteseve, sembireco omondo oñeche chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

20 Evocoi pahi eta rerecuar iyavei judío rerecuareta rumo ava rehi omonguerēhi, “Barrabás tosē; Jesús evocoyase tomano” he ãgua yuvireco.

21 Evocoyase Pilato oporandu iri ava rehi upe:
—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

22 —¿Mbahe vo evocoyase che ayapora Jesús rese chupe acoi ava, “Poropísirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

23 —¿Mbahe ité vo oyapo naporai vahe? —ehi tēi ava rehi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

24 Evocoyase Pilato: “Ndaicatui mbahe moingatu sepi ãgua” ehi tēi oyeupe. Sese ava yaivu guasu catu-catu irise, ogüeru uca i. Ipípe oyepoi opacatu ava rehi rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

25 —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

26 Ahese Pilato omose uca Barrabás; Jesús rumo oinupá iteanga uca tucumbo tupeicha nungar pípe imondo curusu rese yatica ãgua.

27 Evocoiyase mborerecuar sundao vïroique Jesús ambuae oi pipe. Aheve opacatu omboetasa omboyere tupri uca sese yuvireco.

28 Ahese osequiipa iturucuar ichui. Ipare omonde turucuar pïra vahe yuvireco sese

29 iyavei omonde ñaca rese yu piapri, omondo avei ñepeï tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pipe yuvireco.

30 Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco.

31 Êgüe ehi yoyai catu-catu yuvireco. Ipare vïrocuase turucuar pïra vahe ichui, ahese omonde iturucuar ité yuvireco sese. Ichui vïraso curusu rese yatica ãgua yuvireco cute.

Jesús yaticasa curusu rese

32 Acoi yuvinosese yuviraso, osepia mbïa Cirene pendar, Simón serer vahe. Ahe chupe, “Erio, terevosii co curusu Jesús vïreco vahe rese” ehi voiño tēi yuvireco.

33 Oyepotase yuviraso Gólgota serer vahesave, ahe ‘ava ãcagüer’ oya aipo ehi chupe,

34 aheve uva ricuer imboyesehapri mbahe pihaupiar rese omondo tēi yuvireco Jesús toiïhu. Osãha tēi, ndoiïhu potai rumo.

35 Ipare oyatica curusu rese yuvireco. Ahese sundao iguayïño oyeupe iturucuar mboyaho-yaho ãgua rese.

36 Ipare aheve oguapi yuvinoi sãro.

37 Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

38 Ñuvirío imonda rai vahe yaticasa avei curusu rese supive yuvireco, ñepeí mbahe rese ipocosa coti, ambuae evocoyase mbahe rese ipocõhisa coti yuvireco.

39 Acoi ava ñocuasar iñehe-ñehe tẽi, oñeaca mbovava,

40 aipo ehi yuvireco chupe:

—Nde acoi, “Opara tũparo amonduru. Ipare mbosapĩ arĩ rupĩ opa irira amopuha” ere acoi cuese. ¡Eñepĩsĩro ru nde ae cute! ¡Tũpa Rahĩr nde recose, egũeyĩ curusu sui! —ehi tẽi yuvireco chupe.

41 Aipo ehi avei pahi eta rerecuar, Moisés porocuaita rese oporombohe vahe iyavei judío rerecuareta avei; ahe iñehe mara-mara tẽi yuvireco chupe aipo ehi:

42 —Oipĩsĩro ambuae, ahe ae rumo ndoicatuĩ oñepĩsĩro. Israel rerecuar guasu secoise, ¡togũeyĩ curusu sui cũritei, ahese voi seroyasara!

43 Ahe oyeroya Tũpa rese, Tũpa evocoyase oipotase, toipĩsĩro cũritei. Esepia, ahe, “Che Tũpa Rahĩr aico” ehi yandeu cuese —ehi yuvireco.

44 Imonda rai vahe avei rumo acoi yaticapri supive, ahe avei mara ehi-ehi tẽi chupe.

Jesús mano agüer

45 Ahese mbĩter arĩ pipe, opa tupri pĩtu ivi rupi. Ëgüe ehi las tres rupi.

46 Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tũpa,

che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse ñehe, aipo ehi yuvireco:

—Esendu co mbia, Tūpa ñehe mombehusar Elías upe ñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toi hu’ oya.

⁴⁹ Ambuae rumo aipo ehiño yuvireco:

—Ëgüe tehiño rane, ¿oura pñha Elías ipñsiro ãgua? —ehi yuvireco.

⁵⁰ Ahese Jesús sãse pñrata iri, omano.

⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi oriri iyavei ita guasu-guasu oyeca.

⁵² Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco.

⁵³ Ëgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoiyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe Ëgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tñi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahe-

cuer Jesús rupi iyavei setá rupi oipĩtivĩ yuvireco yepi.

⁵⁶ Ahe ipãhuve María Magdalena secói, iyavei ambuae María ahe Santiago, José si, Zebedeo rahir si avei supi secói.

Jesús apocatu agüer tuvipa pipe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar.

⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi.

⁵⁹ José evocoyase vıraso sehögüer. Ipare oimama tuprı turucuar secose vahe ndiquıhai vahe pipe.

⁶⁰ Ichui omoingue ombahe tuvipa ipıasu vahe, ita oyoho uca vahe pipe. Ipare osovapı ita guasu yapayere vahe pipe oso.

⁶¹ Aheve María Magdalena ambuae María rese suvıpa rovai oguapı yuvınoi.

Jesús ruvıpa osãro sundao yuvireco

⁶² Ahere ayihive mbıtuhusa arı pipe, yuvıraso pahi eta rerecuar iyavei fariseo Pilato upe mbahe rese oporandu ãgua

⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuer-ayevıra mbosapı arı pare omano vahe pãhu sui” ehi acoi cuese oıcove vıtese —ehi yuvireco—.

⁶⁴ Sese emondo sundao sehögüer ruvıpa rãro tuprı ãgua mbosapı arı rupi semimbohe ñomiẽhi

ãgua pĩtu pipe yuvireco. Aviyeteramo, “Ocuerayevi omano vahe pãhu sui” aipo ehi tupri tẽi tiẽtera ava upe yuvireco. Aipo ehise yuvireco, yipindar semira tẽi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pẽu. Peraso, pemoviracua tupri ité sãro ãgua —ehi.

⁶⁶ Evocoyase yuviraso tehõgüer ruvipa rãro tupri ãgua yuvireco. Ahese omondo tehõgüer rovapisa ita guasu rese mbahe imomisa cua ãgua yuvireco. Ipare oseya aheve sundao sãro ãgua yuvireco cutẽ.

28

Jesús ocuerayevi

¹ Cõhe ramomise, domingu pipe, María Magdalena iyavei ambuae María yuviraso tehõgüer ruvipa repia yuvireco.

² Aviyeteramo tẽi oriri pĩratá ivi Tũpa rembiguai iva sui igüeyise. Ëgüe ehi oyepota tehõgüer ruvipave ou, ahe virocua itape guasu sovapisa ichui. Ipare iharive oguapi oĩ.

³ Ëgüe ehi sendí iteanga aviye acoi overa vahe. Iturucuar evocoyase morochí eté.

⁴ Osepiase sundao, oriri eteanga osiquiyepave yuvireco ichui, opa oyuca pucu-pucu tẽi yuvireco.

⁵ Tũpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer.

⁶ Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer — ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pëu —ehi Tũpa rembiguai cuña upe.

⁸ Evocoyase cuña yuviraso poyava voi suvipa sui, osiquiye pãhuve rumo ovihãño yuvireco; ãgüe ehi yuvinoñá iteanga imombehu yugüeru oreu.

⁹ Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco.

¹⁰ Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco.

¹² Evocoyase pahi rerecuareta oñemoñeta judío rerecuar rese opihãñemoñeta mboyoya ãgua. Ichui omondo setá guarepochi sundao upe yuvireco,

¹³ aipo ehiño yuvireco chupe:

—Aipo peyera ava uve: “Oroque viteseve pĩtu pipe, ahese revo Jesús remimbohe yugüeru

sehõgüer ñomi ãgua ore sui” peyera —ehi mborerecuar yuvireco chupe—.

14 Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

15 Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūritei judío Jesús cuerayevisa reroyaẽhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

16 Evocoiyase ëgüe orohe oroso semimbohe once oroico vahe Jesús remimombehu ivi Galilea pendar ivitrive.

17 Acoi orosepiase rumo Jesús, ahese oromboetei oroico, yepe moviro tẽi ore pãhu pendar ndoviroya tupri vitei yuvireco viña.

18 Evocoiyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—.

19 Peso ava upe opacatú ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espíritu Santo rer pipe avei no.

20 Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739